

# MAARKO

## Ciig Beer Naa Agweed Maarkoe

### Rob Ke Nying Kitaab

“Ciig Beer ke nying Jeacuu Kriihjto ge Waahd Juog.” (1:1)

Ngo anyoadh Maarkoe kejea Jeacuu gihre beehda tiijh kedea tee nud yihre. Teege niid kii dhe yoohn puohny gihre, yi taaj atiihb ukeehg kedea yi wii adhemuohme piny. Jeacuu ree cuohne cuohno ne ngaa maa adoohng ne dhaano utaahngo maa abeehn ne cub wahye beere nyoge adhemuohm tooro rog gen.

Maarko agweehdo ke nying Jeacuu ke dhe yooh me ne dahr. Maarko kuu arubo ne cohg ke nying luube wale puohny gihre Jeacuu, abea ngo anieng rob ke nying giijh atiihye.

Batien naa arub Maarkoe ka me thiin ke nying Joon Ngad Luogwahy, kaa amuoje wiijh Jeacuu kedea kaa atum atiihb ukeehge Jeacuu e ngo aguo rob ke nying thiehdh naa athiehdhe nyoge ke dhe yoohn kaa apuohnye.

Anyoadh Maarkoe kejea Jeacuu utiihyo yihre Juog kedea abeehn ne tiijh giijh daahd Juoge. Giijh me gaahy nyoge, thiehdh nyoge, taaj atiihb ukeehg kedea tee ne yihre. Giijh nu ge naa anyoadh ngo yihre yaa upiny kejea Jeacuu beehda Waahd Juog adiehr muon (15:39). Cahr Jeacuu yi thoo e ne meehg nyoge yiijh giijh atiihye cang.

### Kaa Acaan Luube

Ka thob Ciig Beer 1:1-13

Puohny yihre nyoge Gaalili 1:14-9:50

Aay Gaalili ne ci Jeruucalem 10:1-52

Nihn dhe caahn Jeruucalem kedea buude 11:1-15:47

Kaa acahr Jeacuu yi thoo 16:1-8

Ruohdh maa acahro kedea tihnge paar maalo 16:9-20

### Puohny Joon Ngad Luogwahy

(Mat 3:1-12; Luk 3:1-18; Jon 1:19-28)

**1** <sup>1</sup> Gihn e naa kaa athub Ciig Beere ke nying Jeacuu Kriihjto ge Waahd Juog kii ngo.

<sup>2</sup> Wa kaa agweede yi kitaab gihre agamloohngjuog ge cuohn ne Yicaaya, kejea Juog arubo kea,

“Maany! Ngad wuohna uohra wong maalo nyumi  
ne gwiir yooh yihri.

<sup>3</sup> Nud ke duol me kwaag yi ukang,

‘Gwiir yooh yihre Ruohdh,

gwiir yooh me ne cohg cohg yihre.’”

<sup>4</sup> Ke nying giijh nu e Joon Ngad Luogwahy ake tuohl yi ukang e puohny nyoge kejea maan gene anyoohne giijh ayug gene kedea umuoj wudh gen ke luogwahy beere anyoohne giijh gen wii piny yihre gen. <sup>5</sup> Nyoge cang ke bang piny Judea maa yi geen Jeruucalem ge anuno bange. Maa abeehn gene urob gene adhemuohme giijh atiihy gene oogo, batiene e wudh gen amuoj Joone ke piijh Juog Naam Joohrdoan ne cub luogwahy yihre gen. <sup>6</sup> Joon na ngaab yiehy amana maa acwaahj kedea deehl e naa atuohje yi badhe. Ngo ne cam caame giijh na yoade yi dom. Ngo na bodh kaa kihj kedea baahnyo. <sup>7</sup> Nyoge apuohnye kobe, “Ngaa me teege akaal wiijh teeg mara muu ulog beehno ke batiene nud. Ngaa me wuora wuoro keraahyo me a be rom gong piny ne goony thoon wuoy tiene. <sup>8</sup> Wudhu muoja kaa piijh now, abea mare teeg Wahy Juog, e nuu ucube yihru.”

### Luogwahy Acub Yihre Jeacuu

(Mat 3:13-4:11; Luk 3:21, 22; 4:1-13)

<sup>9</sup> Yihdh niin nu e Jeacuu ake beehno ke yoohn geen Naajaread yi piny Gaalili bang umuoj wiijh ke piijh Juog ne cub luogwahy yihre. Wiijh amuoj Joone ke piijh Juog yi naam Joohrdoan. <sup>10</sup> Nye kaa abeehne oogo yihdh piijh, e niid giijh maa ayab yea maalo ubeehn Wahy Juoge me neehn akuur uluunge piny ne kew yi wiijh. <sup>11</sup> E duol ake lihngo kii lwahd maalo kobe, “Yih naa waahda maa anhyaara kedea cwihnya med rihi.”

### Jeacuu Atum Atiihb Ukeehge

<sup>12</sup> Ke kaano e Jeacuu alwaahng Wahy Juoge oogo ukedhe ngo yi ukang kar keede, <sup>13</sup> unahge niin jiehariow, e atiihb ukeehg e ne buohj ke tume ne dwaahng. Keehd me ne beed Jeacuu yi ukang keew laahy me reje, e ngo ne kony wuohdjuoge konyo.

### Jeacuu Athubo Ke Puohny Ciig Beer

(Mat 4:12-22; Luk 4:14, 15; 5:1-11)

<sup>14</sup> Batien kaa amag Joon Ngad Luogwahy, e Jeacuu aci Gaalili. Kaano e ngo ake thubo ke puohny Ciig Beer gihre Juog. <sup>15</sup> Athubo ke puohny nyoge kobe, “Cahng anaa arob Juoge abeehno kedea Dhaahr Juog ree anyoadhe arumo, wiiu yug giijh anyoohne kedea yiijh Ciig Beer.”

### Jo Waahdh Giih Acuohn Jeacuue Umodho

<sup>16</sup> Cahng ni e Jeacuu ake caahdho ke bang dieng naam duohng gih Gaalili, e Cimoane maa Andrya umen ge aniide niido e ge umahyo ke booy bang gihn ge anahg yaa maay. <sup>17</sup> Kaano e ge acuohn Jeacuue cuohn kobe, “Beehnu unahgu yaa waahdha. A adaahd udoohngu ne yaa kahl nyoge yihra wa kwaad kaano kahlu rej oogo nu.” <sup>18</sup> Ke wong kaano e booy giih gen awii gene ke piny kedea ubuodh gene batiene.

<sup>19</sup> Ge acidh gene thiin mee ni, e yaay ariow mooge ge aniide niido yi baabuur e ge kwen booy. Anahg Jeamij waahd Jebeade maa Joon umen. <sup>20</sup> Maa acuohn Jeacuue gen, ubuodh gene batien ngo uwii gene Jebeade wur gen yi baabuur maa yaa tiijh giih anaa ajor gene.

### Jeacuu Apuohnyo Kedea Uthiehdhe Dhaano Kaparnaam

(Luk 4:31-37)

<sup>21</sup> Ke batiene e Jeacuu abeehn yi geen Kaparnaam. E anahge Cahng Cabadh (cahng yuohmo) e Jeacuu amon yi wod amaad gih yaa Judea upuohnye yea. <sup>22</sup> Naa athume ke puohny, e nyoge ake gaahy cang yi puohnye, bang gihn apuohnyo wa dhaano me yihre ne teeo, me wa e naa acub loohng Juog giih puohny ke deeh kaa acoon. Ngo kuu apuohnyo wa mar yaa loohng. <sup>23</sup> Kedea kaano, nyin me wihe anaa atiihb reje anaa anudo yi wod amaad. <sup>24</sup> E nyin ake thubo ke maahr piny ke kwaago kobe, “Ngahda yih Jeacuu ngad Naajaread e gihn ne? Gihn keree e ne daahdi rog wan? Yih abeehn ne nahg wan ne? Kedea yih ngahya ne cohg yih naa Waahd Juog naa aohr Juoge.”

<sup>25</sup> Maa acuow Jeacuue ngo kea, “Lengi! E thiow beehn oogo yi kuohm nyin.” <sup>26</sup> Maa apaahj nyine kedea umaahre piny ke lalo e kuohme urihg ni, maa a'aay atiihb reje oogo ree. <sup>27</sup> Kedea ugaahy yaa anaa anudo cang, uthub gene ke peehny rog gen kob gene, “Beehda gihn e gihn? Puohny me nyaahn me yea ne teeo e naa atuohl ne wale gihn? Keehd atiihb reje e urubo yih gen ke duol me teeg kedea uwuor gene lume.” <sup>28</sup> Ke kaano e nyinge awiihj ke bang yi Gaalili.

### Jeacuu Miih Ciih Cimoane Athiehdhe

(Mat 8:14-17; Luk 4:38-41)

<sup>29</sup> Yi kaa apahr Jeacuue oogo yi wod amaad e amon paar ge Cimoane e caahdh tiehd kaa Cimoane maa Andrya umen kedea Joon anaa acidho thiow ke gen. <sup>30</sup> Kaano e miih ciih Cimoane ree anaa jwaahy, ngo abud piny. Nye kaa awahn Jeacuue wahnho e aguoee kaa arobo yihre. <sup>31</sup> Maa abeehn Jeacuue bange umage bad ngo utihnge ngo maalo. Kaano e kuohme ake ngihnyo uay jwaahye oogo ree kedea upiie ne goong gen.

### Atwaanye Me Thoohdh Athiehdh

<sup>32</sup> Ke wong thiehno e cahng kwaar piny, nyoge me thoohdh me rog gen naa atwaanye maa yaa guohb gen ne atiihb reje ge akahl bange. <sup>33</sup> Nyoge me thoohdh giih beed geen nu rog gen acong gene dhe wod. <sup>34</sup> Maa athiehdh Jeacuue nyoge me rog gen naa atwaanye me thoohdh kedea urieme atiihb reje oogo yi kuohm nyoge mooge. Thiow atiihb reje ge kuu ameehg Jeacuue rob bang gihn ngo ngahy gene kejea Jeacuu e naa Ngad Boadh nyoge.

### Jeacuu Acidho Ne Puohnyo Ke Bang Gaalili

(Luk 4:42-44)

<sup>35</sup> Ke nyango e cahng kuu amoohlo, e Jeacuu ayedh maalo ucea kar keede kedea upiie ne kwaj. <sup>36</sup> Maa abeehn Cimoane maa yaae naa anudo keehde, uthub gene ke cej ka ne Jeacuue yea. <sup>37</sup> Maa ayoad gene ngo e ukwahyo, urub gene yihre kob gene, “Nyoge cang ge daahd yihn.”

<sup>38</sup> Maa akobe ngo yih gen kea, “Beeh coa yihdh miehr me cahng mee kan, bang a daahd upuohnya kuohn nu thiow. E naa gihn abeehna ke nyinge.” <sup>39</sup> Maa acidhe ke bang yi Gaalili e puohny nyoge yihdh wuud amaade kedea atiihb reje ge rieme ke oogo rog nyoge.

### Jeacuu Ngad Dhoobo Athiehdhe

(Mat 8:1-4; Luk 5:12-16)

<sup>40</sup> Maa abeehn ngaa me ree ne dhoobo, uthube ke piehj, e cunge arunge piny nyum Jeacuu kobe, “Nea cwihnyi ne bange, e kea yug kuohma udoohnge kwel.” <sup>41</sup> Naa aniid Jeacuue ngoohng wonge, e cinge arwaage bang ngo maa agweele nyin maa arube yihre kobe, “Cwihnya ne bange! Beehn kuohmi doohng kwel.” <sup>42</sup> Nye wong kaano e kuohme ake doohng kwel mee. <sup>43-44</sup> Maa arob Jeacuue ngo yihre kea, “Lihng gihn roba yihri. Gihn ayug ree rihi awaahn ni kan keá waayi yih ngaa moogo. Abea aay awaahn ni ucii ne nyoadh rihi yih ngaa lam giih kweehr umaanye kuohmi. Nea kuohmi amaanye, kea yug giih kweehr wa kaa anaa arob Moaje ngo, bang ne nyoadh ngo yih nyoge kejea dhoobo tooro rihi.” <sup>45</sup> Abea naa a'aay nyine, e ake thubo ke rob gihn ayug ree yih nyoge. Gihn nu e Jeacuu kuu arom beehdo yihdh geedh nu bang gihn nyoge me daahd uthiehdh gen ngo amoal gene ke piny. Noono uaaye maa awiie geew piny ne beehd kare keede. Abea kihde now, nyoge ge apoohdo e ge beehn bange ke bang yihdh miehr ne dug.

### Jeacuu Ngaa Maa Abab Piny Athiehdhe

(Mat 9:1-8; Luk 5:17-26)

**2**<sup>1</sup> Batien niin me noog, e Jeacuu adu Kaparnaam. Naa aliing bange kejea ngo ne paajo ka beede, <sup>2</sup> e nyoge me thoohdh rog gen acong gene congo ubeehn gene bang Jeacuu. Wod anaa apahng ke dhaano utaahngo uwahdhe yi kala kar tiel tooro. Kaano e Jeacuu ake thubo ke puohny gen ke lum Juog. <sup>3</sup> Nyoge angween ge abeehno bang Jeacuu e ge bien dhaano maa abab piny. <sup>4</sup> Naa aniid gene ngo kejea ka me rom gene wahdh wod bang Jeacuu tooro, e ge

ayedh maalo wiith wod<sup>a</sup> maa athub gene ke ngaany ka me rom gene ngaan abab piny lwaay piny kii ngo nyum Jeacuu yi diehr wod. Noono ulwaay gene ngo piny nyum Jeacuu ke belo. <sup>5</sup> Ge aniid Jeacuu kaa ayiith gene kii ngo, e akobe kobo yihr ngaan abab piny kea, “Waahda! Adhemuohme giithi ge awii piny yihr.”

<sup>6</sup> Kiin nyoge kaano yaa loohng Juog ge anaa anudo yi wod tiehd ke Jeacuu. Naa alihng gene gihn arob Jeacuu yihr nyin ni, e cwihny gen ake thubo ke ngoan kob gene, <sup>7</sup> “Nyin rubo wa maano kaa nying gihn? Daahd urome wiith ke Juog kejea anyoohne giith ayug ge wiith ke piny! Wa kuohm Juog adhahe!”

<sup>8</sup> Giith angoan gene ke cwihny gen ge kaa aguo Jeacuu ke ngeyo maa arube yihr gen kea, “Nye yaage! Gihn e ne ngoanu ke nyinge yaa aduunu?” <sup>9</sup> Maa aweehne e ne teeg ke tiithyo, ne rob ngo yihr ngaan abab piny kejea, ‘Adhemuohme giithi ge awii piny yihr ne,’ wale ne rob ngo yihr kejea, ‘Yedh maalo ucaahdhi?’ <sup>10</sup> Awaahn a ge adoohng ne dhaano utaahngo, a utiithyo ke gihr nyepiny kedea uniidu ngo, gihn me be rom ree ke tiithyo yihr dhaano utaahngo ne nyoadh ngo yihru kedea unghayhu ngo kejea yihra ne tee wiith ngoom me wiith adhemuohme giith nyoge piny.” Maa akob Jeacuu ngo yihr ngaan abab piny kea, <sup>11</sup> “Ateeda yihr kaa yedh maalo ukaabi belo giithi ucii paajo.” <sup>12</sup> Maa ayedhe maalo umade yea belo giithre kedea uaaye ke waahdh. Nyoge ge agaahy cang kedea upuoj gene Juog e ge muohj koohr Juog kob gene, “Gihn me wa giith kuu akuong wane ke niido.”

### Leabi Acuohn Jeacuu

(Mat 9:9-13; Luk 5:27-32)

<sup>13</sup> Jeacuu a'ay ucea ne waahdh ke bang dieng naam duohng gihr Gaalili. Gihn nu e nyoge me thoohdh ngo atieg gene piny maa athube ke puohny gen. <sup>14</sup> Naa a'ayee kaano e Leabi waahd Alpaawo aniide niido e ngo apiith ne gwaay cuol maa arob Jeacuu ngo yihr kea, “A daahd udoohngi ne ngad waahdha.” Maa ayedhe maalo uaaye tiehd ke Jeacuu.

### Nywaahg Ke Yaa Adhemuohm

<sup>15</sup> Cahng man e Jeacuu anaa acuohn Leabe paare. Leabi anahg ngad gwaaj cuol. Naa akahl cam e Jeacuu acahmo tiehd ke yaa gwaay cuol maa nyoge maa yaa adhemuohme ge cuohn Judea ne nyoge me reje. Nyoge me thoohdh me neehn yaa ni ge ne na buodh batien Jeacuu. Jo waahdhe thiow ge anaa ake cahmo keehde maa yaa ni tiehd. <sup>16</sup> Kaa aniid yaa loohng Juoge giith Paarijea ngo e ucahmo tiehd ke yaa nu, e jo waahdh Jeacuu apeehny gene peehnyo kob gene, “Beehda ke nying gihn e beehn Jeacuu upiith ne cam ka maa acielo keehd yaa gwaaj cuol maa nyoge me dhahl loohng Moaje? Kwihye kejea ge nyoge maa amaan paajo me gihn me nweehd nyoge ke gen tooro ne?”

<sup>17</sup> Ge alihng Jeacuu rob nu e arobe robo yihr yaa loohng kea, “Padh yaa rog gen tooro atwaanye ge ne daahd akiihm, abea beehda nyoge me tuu ge ne daahd akiihm. A kuu abeehn wiith piny kan kaa nying yaa koohbo kejea ge abiohgrwaale. A abeehno kaa nying yaa ayiith ngo rog gen kejea ge yaa adhemuohm.”

### Lubo Ke Nying Kweehr Cam Kedea Cabadh

(Mat 9:14-17; Luk 5:33-39)

<sup>18</sup> Yihdh nihn nu e jo waahdh Joon Ngad Luogwahy maa Paarijea ge anaa ake kweehro ke caame noono e ge be na cahmo ke nying woor Juog. Kaano e nyoge abeehn bang Jeacuu upeehny gene ngo kob gene, “Wa yaa waahdh Joon maa yaa Paarijea ge be cahmo ke nying gihn yug gene giith kweehr yihr Juog, abea yaa waahdhi ge be kweehro kaa nying gihn?”

<sup>19</sup> Maa abeehr Jeacuu ngo yihr gen kea, “Kare nud umeehg yaa acuohn athiehg yi nyuohme kweehr cam abea athiehg nud bang gen ne?” <sup>20</sup> Abea cahng ukaab athiehg oogo bang gen ubeehn. Cahng nu e nuu ukweehr gene cam.

<sup>21</sup> “Padh kare udhahb dhaane waaro me nyaahn rih jwaahd waaro maa ayiej. Bang gihn nea waahro gihn nu ree cea ke ne juunyo e wong kaa adhab ree cahge kaa jwaa” <sup>22</sup> Dhaar weehne e naa akuong koongo me yaahny ke pee yi keej maa acoon maa akuoj? Dhaar yug ngo wa giith nu udaar ke koongo.”

### Jag Cwed Beel Cahng Cabadh

(Mat 12:1-8; Luk 6:1-5)

<sup>23</sup> Cahng man, Cahng Cabadh, e Jeacuu anaa ake caahdho keehd jo waahdhe e ge cor yi puohdho. Kaano e jo waahdhe ge ake thubo ke jag cwed beel e ge raam gene ke maalo. <sup>24</sup> E yaa Paarijea ge ake rubo yihr Jeacuu kob gene, “Maany kwaad gihn yug jo waahdhi! Ge tiithy gihn maa acier loohng Moaje ke tiithyo cahng Cabadh.”

<sup>25-26</sup> Maa abeehr Jeacuu ngo kobe, “Ka moogo e gihn anaa atiihy Deabid Ruohdhe naa anahg kahje en maa joe anaa akwaanu? Deabid anaa abeehn ne ci yi Wod Juog maano e Abithaar e naa anahg ngad duohng yaa lam ucame amune giith lam ne giith kweehr kedea ucube mooge yihr yaae ne camo. Abea beehda amune me be cam dhaane maa now me padh ngad lam giith kweehr.”

<sup>27</sup> Maa agooye wiith robe piny kea, “Cahng Cabadh ayug Juoge kaa nying dhaano, abea Juog dhaano keá cago ke nying Cahng Cabadh. <sup>28</sup> Nea neehn maano e kare nud yihra a ge adoohng ne dhaano utaahngo, ugweehga gihn yug jo'a Cahng Cabadh bang gihn a naa ruohdh acub loohng gihr Cabadh yi cinge.”

### Nyin Me Cinge Abaahl Athiehdh

(Mat 12:9-14; Luk 6:6-11)

**3** <sup>1</sup> Cahng man e Jeacuu anaa aci yi wod amaad gihr Judea. Dhaano me cinge abaahl anaa anudo yi wod. <sup>2</sup> Gihn nu, e nyoge mooge maa anaa apiith thiow ge anudo yi wod amaad, nyoge maa alwaay rog gen piny ne maany gihn uyug

<sup>a</sup>2:4 Wuud Judea ge ke geero uyoat ka me yedh dhaane wiith wod ugeere thiow. Wiith wod geer wa mar abar ngo ne caja.

Jeacuu Cahng Cabadh rih nyin cinge abaahl. Nea ngo thiehdhe thiehdho e Jeacuu luom gene luomo bang gihn loohng Juog adhahle naa athiehdhe dhaano Cahng Cabadh.<sup>3</sup> Kaano e Jeacuu nyin cinge abaahl acuohne cuohno bange kea, "Beehn wong maalo kan ne cuung yi diehr kiin nyoge." Maa acidh nyine bange.

<sup>4</sup> Kaano e yaa ni alwaay rog gen piny ge apeechny Jeacuu peehnyo kobe, "Beer gihn aweehne ke tiihyo Cahng Cabadh? Tiihy gihn me beer ne wale tiihy gihn me raaj? Kony wahy dhaano uthiehdhe ne wale paahl dhaano oogo uthowe?" Maa aleng gene ne caaj e gihn arob Jeacuu kuu abeehr gene.

<sup>5</sup> Keehdo e Jeacuu amaahny bang gen e cwihnye raaj bang gihn aniide e wudh gen teeg maa arobe ngo yihr nyin cinge abaahl kea, "Nyieh! Riihy badi." E nyin bade ariihye riihy ubeehn bade udoe kare ne rihb.<sup>6</sup> Yaa Paarijea naa alwaay rog gen piny ne tudo rog gen akwany gene maalo naa aniid gene gihn atiihy Jeacuu. Maa awaad gene oogo ucog gene wudh gen keehd yaa batien Eroade ne gweehg dhe yooh me nahg gene Jeacuu.

### Amahr Nyoge Batien Jeacuu Abuodh Gene

<sup>7</sup> Maa abeehn Jeacuu uaaye ke jo waahdhe uci gene dhe naam duohng. Gihn nu maa awaad nyoge me thoohdhe bange ke yoohn piny Gaalili<sup>8</sup> kedea ke yoohn piny Judea maa geen Jeruucalem maa piny Yiduuma. Nyoge mooge ge abeehno ke yoohn naam Joohrdoan kedea mooge thiow ke yihdh miehy cahng ke geen Taayr maa geen Ciihdoan. Jo ni thoohdh ge abeehn bang Jeacuu naa alihng gene ngo kejea giih me thoohdh ge atiihye.<sup>9</sup> Kaa aniid Jeacuu ngo kejea nyoge me thoohdh ge waahd bange, e akobe yihr jo waahdhe kea gwiir gene baabuur yihre beere e urubo yihr nyoge ke ka me baahr ke gen.<sup>10</sup> Nyoge me thoohdh ge athiehdh Jeacuu cahng nu, e naa gihn apoohe e yaaj mooge ge nyiihng bange ne gweel kuohme ke cing gen beere ge thiehdhe thiehdho.<sup>11</sup> Yaa rog gen naa atiihb ukeehg, ge niid gene Jeacuu, e rog gen riedh gene ke piny thaahdh tiene ne wuor ngo e ge uyuog ke deeh lalo me teeg kob gene, "Yih naa Waahd Juog ke ngude."<sup>12</sup> Abea ge na cuow Jeacuu cuowo teeg mee bang gihn kuu adaahd ngo urob gene ngo yihr nyoge kejea e Waahd Juog.

### Jo Jeacuu Ge Apaar Wonge Ariow

(Mat 10:1-4; Luk 6:12-16)

<sup>13</sup> Batiene e Jeacuu a'aay ucea wiith good maa acuohne yaae ge daahde ke cwihnye bange. Maa abeehn gene bange<sup>14</sup> ukwanye nyoge apaar wonge ariow kiin gen maa acube nying acielo yihr gen kejea ge ucuohn ne jo oohr. Adaahd ngo ubeehd gene buude beere ge oohre ke oogo ne puohny lum Juog yihr nyoge.<sup>15</sup> Thiow ge amuoje ke teego me riem gene atiihb ukeehg oogo rog nyoge.<sup>16</sup> Yaa anaa akwany Jeacuu ge gen: Cimoan me nying tuode acag Jeacuu ne Piihter, (Lum yea beehda kihdo).<sup>17</sup> Maa waahd Jebeade kar ge ariow, Jeamij kedea Joon kedea ucube nying acielo yihr gen kejea ge ucuohn ne Boneargya (Lum yea ge teeg wa maahr kodh).<sup>18</sup> Maa Andrya kedea Pihlihb maa Bartholomeao, Matheewo, Thoamaj, Jeamij waahd Alpaawo. Thaadoj, maa Cimoane<sup>b</sup> <sup>19</sup> kedea Juudo Yijkaarid ngaan anaa abeehn ne luom Jeacuu.

### Jo Paar Ge Jeacuu Cwihny Ge Adiidh Ke Nying Jeacuu

(Mat 12:22-32; Luk 11:14-23; 12:10)

<sup>20</sup> Batiene e Jeacuu ado paajo abea keehd maano e nyoge rog gen acahg gene ke congo, ubeehn gene bange. Nyoge anaa amahdo thoohdh kedea utoor kar cam ke ngude yihr Jeacuu ke jo waahdhe, bang gihn ge ake rubo yihr nyoge.<sup>21</sup> Kaa alihng jo paar ge Jeacuu ngo, e ge abeehn ne maany ngo bang utuu gene en bang gihn nyoge akoohbo kejea, "Wiihe be beer."

### Jeacuu Kedea Ruohdh Atiihb Ukeehg

<sup>22</sup> Yaa loohng Juog naa abeehno ke yoohn Jeruucalem ge arubo yihr nyoge kejea Jeacuu ree ne ruohdh atiihb ukeehg ge cuohn ne Beeljebuul. Arob gene yihr nyoge mooge kejea padh ke dhe yooh maa now e ne riem Jeacuu atiihb ukeehg oogo rog nyoge, abea ge rieme oogo kaa tee maa acub Beeljebuule yihre.<sup>23</sup> Gihn nu e nyoge acuohn Jeacuu bange upeechny gen e robe kaa ucaale kobe, "Kare nud ubeehn atiihb ukeehge urieme ree oogo rih dhaano?"<sup>24</sup> Beer, abea nea tien paajo acielo ree apaahngge udog gene rog gen ke liny, e tien paan nu ngo be taaj ne?<sup>25</sup> Kedea ne nyethea dhaano acielo ge adog rog gen ke liny, e paan nu be toar ne?<sup>26</sup> Wa gihn nu thiow, atiihb ukeehg ka me doge ree tooro. Nea dog ree e wiihe dhiil guuo utoor gihr nyinge.<sup>27</sup> Ngaa noono rom cidh ne tub paar ngaa me teeg me yihre ne waahd? Paar ngaa nu be rome ke tubo nea padh taajo e naa ataaj gen kedea utuohy gen piny. Kaano arumo e giih paar ngaa me teeg ge rom kaa tubo utoor gihn me doohng.<sup>28</sup> A rob athiir yihru, adhemuohme giih nyoge cang ge uwii piny kedea kwaad luube me reje giih ateed ke nying Juog ge uwii Juoge piny thiow.<sup>29</sup> Abea kwaad ngaa rob luube me reje rih Wahy Juog, adhemuohme be wii piny bang gihn be rom ree ke wuuny oogo."

<sup>30</sup> Jeacuu yea acoodhe piny ke nying gihn arob ree, naa ree ne atiihb ukeehg.

### Yaa Wad Ke Jeacuu

(Mat 12:46-50; Luk 8:19-21)

<sup>31</sup> Batiene e miih Jeacuu maa ge wuud wahn ge ake beehno ucuung gene yi kala maa aohr gene dhaano acielo wod bang Jeacuu ne rob ngo yihre kejea ne nyoge me daahd en yi kala.<sup>32</sup> Nyoge me thoohdh ge anaa wod bang Jeacuu. Maa ateede yihre naa, "Miihu maa wuud wuru gen nii kala yih daahd gene daahdo."

<sup>b</sup>3:18 Cimoan gihn ngahj kejea yaa Roama ge be daahde umag gene paar Judea.

<sup>33</sup> Maa abeehr Jeacuue ngo yihr gen kea, “Ngaa e naa miha? Kede a yaa weehne ge naa wuud wura?” <sup>34</sup> Maa amaahnye bang yaa anaa apiih buude batiene e akobe, “Maahnyu kan! Yaa ni ge naa ge miha maa ge wuud wura!” <sup>35</sup> Kwaad dhaano me tiihy gihn daahd Juoge, e naa nyewura kede a e naa miha kede a e naa uwura.”

### Ucaale Gihr Ngaa Maa Ayor Koohdhe Yi Puohdhe

(Mat 13:1-9; Luk 8:4-8)

**4** <sup>1</sup> Cahng man keehdo Jeacuu anaa ne puohny nyoge dieng naam duohng. Nyoge giijh anaa amahdo buude ge anaa athoohdho keter. E niide ngo wa gihn nu, e adhiil ci yi baabuur me cahng ke dhe agala beere nyoge puohnye puohnyo. <sup>2</sup> Kaano e ake thubo ke puohny nyoge ke giijh me thoohdh, e ge puohnye kaa ucaale kobe, <sup>3</sup> “Lengu do! Umodho coon nyin moogo koohdhe anaa akaabe ne ci yi puohdho ne puur. <sup>4</sup> Abea naa ayore koohdhe e mooge ge apahdh thaahng yooh maa abeehn winye uted gene gen. <sup>5</sup> Koohdhe mooge ge apahdh wong leelo me yea tooro ngoom me beeye. Koohdh nu ge atuuy uyuuj beele maalo piow piow. <sup>6</sup> Abea naa alier cahng, e ge aguo nahro utal gene bang gihn bieh gen kuu anieng piny. <sup>7</sup> Mooge ge apahdh piny yi dhyaay kede a moodho. Abea naa adoong gene, e ge ake juul bang gihn ge ateel dhyaaye piny maa abahng ge kuu acieg. <sup>8</sup> Abea koohdhe mooge ge apahdh ka me yea ne ngoom me beeye maa atuuy gene beer mee kede a ucieg gene, me wiih acielo yea ne cwed beel kar dhaano aduuno wonge apaar kede a mooge yihdh gen ne jiehadahg kede a mooge dahng yihr gen ne jiehabiijh.”

<sup>9</sup> Maa agooy Jeacuue wiih lume piny kea, “Nea ngaa yihdhe nud me lihngo, e kea lihng.”

### Gihn Rub Jeacuue Kuu Ucaale Ke Nyinge

(Mat 13:10-17; Luk 8:9, 10)

<sup>10</sup> Naa adoohng Jeacuue keehd joe ge apaar wonge ariow maa yaaj mooge giijh caahdh keehde batiene kaa a'ay nyoge, e Jeacuu apeehny gene peehnyo ke gihn ne yihdh luub ucaale giijh robe yihr nyoge. <sup>11</sup> Maa arobe ngo yihr gen kea, “Ne ngej yihdh luub Dhaahr Juog beehda Juog e naa acub ngo yihru wu jo waahdha. Abea ngo rob yihr nyoge mooge maa now kaa ucaale. <sup>12</sup> Ngo udoohng wa kaa anaa agweede naa,

‘Nying gen upeeny gene piny ne maahnyo

abea gihn muu uniid gene utooro

kede a yihdh gen uceg gene piny ne lihng

abea gihn muu ulihng gene utooro.

Nea be ne nahg wa gihn nu, e giijh nyepinye ne niid gene

kede a ge ne lihng gene, noono e wudh gen ne waar gene

udog gene bang Juog

uwiie anyoohne giijh ayug gene piny yihr gen.’ ”

### Yea Lum Ucaale Koohdhe Maa Ayor Dhaane

(Mat 13:18-23; Luk 8:11-15)

<sup>13</sup> Maa apeehny Jeacuue gen kea, “Abea wun, ucaale gihn yea adeadu ne? Nea yea kuu adeado e ucaale mooge yihdh gen ungeyu ke naa diih? <sup>14</sup> Ngad yor koohdhe neehn ngad puohny lum Juog. <sup>15</sup> Nyoge mooge keew yaa alihng lum Juog ge uroomo ke koohdhe giijh apahdh thaahng yooh ucam winy gen. Umodho kaano e lum Juog anaa alihng gene beer mee, batiene ka me thiin e atiihb ukeehg ake beehno ukahle lum Juog oogo yi cwihny gen. <sup>16</sup> Wa kwaad maano, koohdhe giijh apahdh kiin leele ge nyoge me lum Juog alihng gene umodho ke med cwihny. <sup>17</sup> Abea ge nyoge me cwihny gen be teeg yi guum giijh me reje. Noono e ge ukweer ke lum Juog. <sup>18</sup> Yaa neehn koohdhe giijh apahdh yi piny dhyaay kede a moodho ni, kwaad yaa nu ge nyoge me lum Juog alihng gene. <sup>19</sup> Abea gihn raaj ke gen, beehda gihn poohde e cwihny gen udiuw kede a cwihny gen poohd ne bang giijh lonyo maa giijh upiny. Kwaad giijh nu lum Juog kahl gene ke oogo yi cwihny gen kede a udoohng gene ne nyoge me be bar maalo ke lum Juog. <sup>20</sup> Abea nyoge mooge ge neehn koohdhe giijh apahdh ka me yea ne ngoom me beeye. Yaa nu lum Juog alihng gene kede a uyiih gene ngo ke cwihny gen cang ne jwag giijh beeye ge tiijh yihr Juog. Gihn nu e naa arom rih beel maa acieg me wiih acielo yea ne cwed beel kar dhaano aduuno wonge apaar kede a mooge yihdh gen ne jiehadahg kede a mooge dahng yihr gen ne jiehabiijh.”

### Puohny Jeacuu Lihng Kede a Baare Wong Maalo

(Luk 8:16-18)

<sup>21</sup> Jeacuu arubo thiow yihr gen kobe, “Kare nud ukahl lama yea wod ucahge ke wum piny kaa adiido ne? Wale ukaabe ucube thar agreehm? Ngahda ngo cub maalo ka me meenye yi wod cang? <sup>22</sup> Bang gihn kwaad gihn wiihe wum, wiihe uaal oogo beere ke niido. <sup>23</sup> Nea ngaa yihdhe nud me lihngo, e kea lihng.”

### Ucaale Me Nyoadh Dhe Yoohn Akoohg Gihr Juog

<sup>24</sup> Maa acahge rob yihr gen kea, “Cubu cwihnyu piny udeadu yihdh luube giijh alihngu. Kwaad kaa tiihyu kii ngo <sup>25</sup> e ne wiihe uduog Juoge yihru. Ateeda wa maano bang gihn ngaa me yihre ne giijh me beeye me thoohdh, giijh nu ge udhiil Juoge ke jwaa ke mooge me thoohdh. Abea ngaan yihre tooro nyepiny, keehd gihn anaa yihre ngo udhiil ke twahr oogo yi cinge.”

### Ucaale Gihr Kohnho Maa Atuu E Keede

<sup>26</sup> Maa acahge rob kea, “Dhaahr Juog ngo neehn koohdhe maa ayor yi puohdho. <sup>27</sup> Batiene kaa ayor koohdhe e ngaan ayor gen gihn maa acahge ke yugo tooro. Abea keehd maano atoor gihn maa atiihye, e koohdhe ge atuu ke dhe yooh me kwihye. <sup>28</sup> Beehda beey piny keede e naa ameehg beel ciege. Umodho beehlo udoongo batiene e ngo udhahyo kedea uciege. <sup>29</sup> Naa aniide beel ge aciege e ngo angeye kejea kar kaj abeehno, noono maa akaje gen.”

### Ucaale Gihr Kohnho Me Thin Wa Wong Jaaro

(Mat 13:31, 32, 34; Luk 13:18, 19)

<sup>30</sup> Maa acahge rob kea, “Dhaahr Juog uroma ke rih gihn? <sup>31</sup> Wale a ucaal gihn ne rome keehde! Ngo uroomo keehd wong jaaro ge thiin maa akaab dhaane upiidhe ngo. <sup>32</sup> Abea keehd me thiin kohnho yaadh gihn apiidh, e ngo beehn ne doongo udoohnge ne yaadh me duohng keew yen kedea ukaare ke baahd me thoohdh. Kaano e winy wuud gen geer gene ke wiihe.”

### Gihn Beer Rob Kuu Ucaale

<sup>33</sup> Ke dhe yoohn ucaale me wa giijh ge naa apuohny Jeacuue nyoge ne ngahy lum Juog wa kwaad kaa rom gene ngo ke ngahyo. <sup>34</sup> Nyoge ge keá puohnyo kaa dhe yoohn cuohn loohng, abea ge apuohnye kaa ucaale. Abea ge adoohnge ke jo waahdhe ge keed gen, e yihd ucaale ge adoge ke kwaano yih gen beer mee.

### Jeacuu Yamo Me Teeg Acuowe Une Dihl

(Mat 8:23-27; Luk 8:22-25)

<sup>35</sup> Kaa awahdhe ke thiehno cahng nu acielo, e akob Jeacuue yih jo waahdhe kea, “Ngudo loo naam duohng kun ca.” <sup>36</sup> Maa akiiw gene baabuur e Jeacuu ree keá daa kaa anaa apiihe yea. Akuud nyoge ge anaa awii gene ngahdh gen kedea baabuure mooge ge anudo tiehd ke gen. <sup>37</sup> Kaano e deeh yamo me duohng ree atihnge tihngo maa anahg piihe thaga yi baabuur ka athewo umiid baabuure olo. <sup>38</sup> Abea Jeacuu wonge kaa akwal niine. Maa atahng gene ngo kob gene, “Ngad puohny! Gihn keree e bahngge wa be konyi yi thoo? Maany baabuur ka daahde diih piny ke won.”

<sup>39</sup> Noono e atahng ucuowe yamo cuowo kobe, “Cuungu.” Maa acuung yame kedea piih ne dihl.

<sup>40</sup> Maa arub Jeacuue yih gen kobe, “Gihn e mag lwahre wun? Wa lum Juog poohd kuu ayiihu!”

<sup>41</sup> Maa ane wudh gene yoam ke lwahr. Kaano e ge ake thubo ke peehny rog gen kob gene, “Kwaad ngaa me ngihde e gihn? Keehd yamo kedea athewo ngo wuor gene wuoro thiow?”

### Atiihb Ukeehg Gihr Graaja

(Mat 8:28-34; Luk 8:26-39)

**5** <sup>1</sup> Batiene e Jeacuu maa jo waahdhe ge awahn loog naam duohng, yi piny yaa Graaja. <sup>2</sup> Nye kaa abeehn Jeacuue wiih agala keehd yaae, e ngo ake roohmo ke ngaa me ree naa atiihb ukeehg. Ngaan ngo abeehno kaa yoohn wudh leehde <sup>3</sup> ka beede. Abea keehd me tuohy cinge kedea tiene ke gele, <sup>4</sup> e ge coohde coohdo. Noono uutor ngaa me teeg me rom ngo ke mag piny. <sup>5</sup> Ke nying nihn, decahngo kedea dewaahr, ngo na beehdo kaa ngweej ke lalo ke bang wudh leehde maa wudh goode. Thiow ngo na beehdo kaa thom ree ke leee.

<sup>6</sup> Kaa aniide Jeacuu ke ka me baahr, e agoohd bang ngo upahdhe wudh conge nyume ne wuor ngo wa ka wuor ngaa me duohng. <sup>7</sup> Kaano e Jeacuu akaange oogo ke rob e ukwaago kea, “Gihri gihn ke an, Jeacuu Waahd Juog Aciehg! Wongi akwaya nyum Juog, a keá joothri keter.” <sup>8</sup> Wong Jeacuu akwaye bang gihn Jeacuu anaa athubo ke riem atiihb ukeehg oogo rih nyin.

<sup>9</sup> Kaano e Jeacuu atiihb ukeehg apeehnye peehnyo kea, “Nyingi ngaa?”

Maa abeehre ngo kea, “Nyinga Amahr, bang gihn wa thoohdh keter.” <sup>10</sup> Kaano e atiihb ukeehg apiih ne kway wong Jeacuu kejea ge keá rieme piny moogo.

<sup>11</sup> Abea nye kaano akwaye wong Jeacuue, amahr kudhrue ge anaa ake nyahmo dieng good. <sup>12</sup> Maa abeehn atiihb ukeehge, ukwaye wong Jeacuu kobe, “Riem wan yihd kudhrue giijh ca umon wane rog gen.” <sup>13</sup> Maa ameehg Jeacuue ge mon rog kudhrue. Ge anahg kudhrue me thoohdh me wahdh kar alihbe ariow. Gihn nu e kudhrue ge ane rudh ke ngweej, e ge loohn piny ke dieng good maa anahg gene thoahd yi naam duohng umud gene.

<sup>14</sup> Kaa aniid yaa kwaahde kwaad gihn nu, e ge ake goohdo ke ngweej ne rob gihn ayug ree yih nyoge ke bang yi geew kedea miehy cahng ke geew. Kaano e nyoge ake rihngo ne maany gihn ayug ree. <sup>15</sup> Naa awahn nyoge e ge niid ngaan ree anaa atiihb ukeehg e ngo apiih now kedea angahbo beer mee kedea wiihe kwel bekihd gihn me ne ree. Gihn nu e nyoge atud yi deeh tee gihn ariem atiihb ukeehg oogo ree. <sup>16</sup> Noono uthub yaa anudo kaa anaa ayug gihn nu ree yea, ke kwaan gihn ayug ree rih nyin ree anaa atiihb ukeehg kedea gihn ayug ree rog kudhrue. <sup>17</sup> Naa alihng giijh ayug rog gen e wong Jeacuu akway yaa geen nu kwaayo kejea aaye oogo yi geen gen.

<sup>18</sup> E naa adoohnge wa Jeacuu yedh yi baabuur, e nyin ree anaa atiihb ukeehg wong Jeacuu akwaye kwayo beere ge ucaahdho tiehd. <sup>19</sup> Lum nyin kuu ayiih Jeacuue. Noono maa akoohbe yih ngo kea, “Do paaru bang waahdu ne teed gihn beer atiihy Juoge yihri. Bang gihn Juog cwihnye aluue caahn rihi e naa gihn ayuge gihn me beer yihri.” <sup>20</sup> Maa a'aay nyine ucea paar gen kedea uthube ke waaj gihn ayug Jeacuue yihre ke bang wudh geedhe giijh cuohn ne Geedhe Apara. Yaa alihng giijh ateed nyine ge adog gaahy yi kwaad gihn me wa gihn nu.

## Nyaar Jearuuj Kedeä Dhaar Wuur Reme Ree

(Mat 9:18-26; Luk 8:40-56)

<sup>21</sup> Jeacuu a'aay ke baabuur udoge ngudo loog naam duohng. Kaano e nyoge me thoohdh wiih ngo acong gene piny utoor kar tiele. <sup>22</sup> Ruohdh wod amaad gihr Judea me nyinge Jearuuj abeehno upahdhe wudh conge nyum Jeacuu <sup>23</sup> ne kway wong ngo kobe, "Nyaara, me thiin ne piny kaa atwaany kar wahy tooro ree. Beehni uci ne cub cingi wiie beere ngo ubodho." <sup>24</sup> Gihn nu e ge apahdh yooh tiehd keehd Jeacuu ne ci paar nyin.

Amahr yaa anudo thiow rog gen akwany gene ne waahdh tiehd ke Jeacuu. Ngo anaa atieg piny ne cohg ucaahdh gene e rog gen thiehr gene thiehro maahdh maahdh.

<sup>25</sup> Keew amahr yaa nu atieg ngo piny, dhaago anudo maa abang atwaanye keter. Dhaago me remo uwuur ree ke run apaar wonge ariow e ngo be cuung. <sup>26</sup> Run nu ge anahge kaa raahm. Bekihd ngad theehdho me keá tumo, abea e naa kaa adhal atwaanye. Awaahn ni ngo adoohng ke cinge now bang gihn giij anaa yihre cang ge arwaahnyo ke nying atwaany. <sup>27</sup> Dhaar ni, bang Jeacuu alihngo yihre ke coon. Naa aniide Jeacuu e amoal amahr nyoge piny, e abeehno ke ngahy Jeacuu maahdh. Ge awahnhe buud Jeacuu <sup>28</sup> e ngo agweehge ke cwihnye kea, "Keehd me gweela ke waaro gihre now e atwaany uaay oogo riha." <sup>29</sup> Nye kaa agweele waahr Jeacuu gweelo e aguoë kaa yoado e wahye aduu ree bang gihn remo acuungo.

<sup>30</sup> Nye kaano acuung reme e naa nye kaa angej Jeacuue ngo kejea tee gihr thiehdh nyoge gihn ree ngaa maa athiehdhe nud! Gihn nu e Jeacuu amaahny ngahye maa apeehye kea, "Yaage! Ngaa e naa agweel an?"

<sup>31</sup> Maa abeehr jo waahdhe ngo yihre kob gene, "Ngo be niidi e nyoge yih miid gene kaa jwang piny ne? Yih dog gihn ke peehnyo kii, 'Ngaa e naa agweel an?'" <sup>32</sup> Abea Jeacuu ake maahnyo ke ngaa agweele. <sup>33</sup> E dhaar ni ngo aguoë ke modho ubeehne wong maalo nyum Jeacuu maa athube ke teed athiir gihn ayug ree. <sup>34</sup> Maa akoohb Jeacuue kea, "Nyaara. Cidhi ke yoohm rihi. Yiiho mari yih aboadhe."

<sup>35</sup> E poohd e Jeacuu urubo ke dhaar ni, e dhog awahnho yihr Jearuuj ke yoohn paare kejea atwaany nyaari adoohng ne gihn me raaj, gihn me nahgi ruohdh ke waahdh ke nyinge tooro.

<sup>36</sup> Jeacuu, gihn arob ngo adhaahre maa arube yihr Jearuuj kea, "Yih keá tudo abea yiiho gihri ge nii cwihnyi kejea nyaari thiehdha thiehdho yea ngo keá waari." <sup>37</sup> Kaano e Jeacuu Piihter maa Jeamij kedeä Joon umen ge anaa akwany cog ne yaa bar keehde ne ci paar Jearuuj. <sup>38</sup> Naa awahn gene paar ruohdh e ge yuud paajo e ane juj ke lalo. <sup>39</sup> Kaano e Jeacuu amon wod, maa arube kea, "Wu yuog gihn? Nyethiin kuu athow gihre beehda niine!" <sup>40</sup> E yaa anaa wod ge angiero kejea gihn me ngahy Jeacuue ke nying thoo tooro.

Kaano e ge ariem Jeacuue ke oogo yi wod kedeä uaaye keehd wur nyethiin maa men kedeä joe ge adahg ge anaa acaahdhe keehd gen ne ci wod apiehl nyethiin yea. <sup>41</sup> Naa awahnhe wiih nyethiin e bad ngo atihng ke maalo maa akoohbe kea, "Nyethiin, ateeda yihri kejea tihng rihi uyedhi maalo." <sup>42</sup> Ke wong kaano e nyethiin a'aj maalo uthube ke waahdh (Rune anahg apaar wonge ariow.) <sup>43</sup> Noono, maa arub Jeacuue kejea muoj nyethiin ke cam. Nyoge acwaahng naa aniid gene gihn ayug ree. Abea arob Jeacuue yihr gen kejea keá them gene piny urob gene gihn ayuge yihr nyoge mooge.

## Jeacuu Aci Ne Liew Naajaread

(Mat 13:53-58; Luk 4:16-30)

**6** <sup>1</sup> Kaano e Jeacuu abeehn ne aay Kaparnaam ne ci geen paar gen, Naajaread ge anaa akuonge puohny yea. Jo waahdhe ge ake caahdho keehde tiehd. <sup>2</sup> Ge anahge Cahng Cabadh e Jeacuu nyoge apuohnye puohnyo yi wod amaad. Nyoge me thoohdh ge anaa anudo cahng nu maa alihng giij puohnye. Kaa alihng gene puohny Jeacuu lihngo, e dhog gen ake talo naa agaahy gene yi puohnye.

Kaano e ge ake peehyo ke rog gen kob gene, "Naa ceh! Kwaad puohny ni ayoade ke kee? Ngaa e naa amuoj ngo ke teeg wong ngey yihdh luube kedeä tee me rome giij me gaahy nyoge ke tiihyo?" <sup>3</sup> Ngahda beehda waahd nejaar ne? Ngahda waahd dhaar cuohn ne Maarya ne? Jeamij maa Jocebe maa Juudo kedeä Cimoane ngahda ge beehda wuud wahn ne? Ge nye wahn, ngahda ge nud ke won kan ne?" Noono maa akweer gene ke yiih lume.

<sup>4</sup> Maa abeehr Jeacuue ngo yihr gen kea, "Keehd me yiih nyoge mooge giij tiihy agamloohngjuoge, e yaa geen gen kedeä waahde ge be yiih gene naa athere." <sup>5</sup> Bang gihn akweer yaa paar gene ke yiih ngo kejea e rom tiihy giij me gaahy nyoge, e gihn maa arome ke tiihyo kaano tooro abea anahg nyoge me noog mee ge naa acube cinge wudh gen ne thiehdh atwaany gen. <sup>6</sup> Maa agaahy Jeacuue keraahyo ke nying gihn bahngge ngo be yiih gene kejea Juog e naa acub tee ne yug giij me gaahy nyoge kedeä dhe yoohn ka apuohnye kii ngo.

## Jo Oohr Ge Aohr Ne Tiihj

(Mat 10:5-15; Luk 9:1-6)

Kaano e Jeacuu paar gen awiie ke piny ubare wong maalo ke wen keew miehr e ngo upuohnyo. <sup>7</sup> Cahng man e Jeacuu joe ge apaar wonge ariow ge acuohne. Naa abeehn gene, e ake rubo yihr gen kea, "Yaage! Wu acuohna bang gihn cwihnya ne oohr wun ke bang yihdh miehr ne puohny nyoge. Tee me riem atiihb ukeehg oogo ngo acuba yihru.

<sup>8-9</sup> "Abea nea wu uaay kea kaahn dhaane kaa goohd kedeä nahge ke wuoy nii tiene maa waahr ne ree ge ne kaahne cog. Keá ngaa kaahn cam, ludho wale ngiihny. <sup>10</sup> Nea wu awahdh yi geew ubeehn dhaano ucuohne wun ne beehdo paare, e kea beehdu paan nu kedeä nahge paan nu e ne kwaayu do yea nea wu caa ne puohny. <sup>11</sup> Nea wu kuu alor kedeä nyoge akweer ke puohny gihru kea wiiu kaano piny. Abea yi aay aayu kea teeng dhaane ngoom kaano oogo yi tiene ne nyoadh ngo kejea nea gihn me yoad gen, e maru tooro yi ngo." Batien kaa athum Jeacuue ke rob e ge aohre ke bang yihdh miehr naa ariow ariow.

<sup>12</sup>Noono upahdh gene ke yooh kedea e ge puohny nyoge kejea maan gene anyoohne giij reje naa atiihy gene kedea wii gene gen. <sup>13</sup>Atiihb ukeehg me thoohdh ge ariem gene oogo rog nyoge kedea wudh yaa atwaany arej gene ke mow maa athiehdh gene gen.

### Joon Ngad Luogwahy Wiihe Angol Oogo

(Mat 14:1-12; Luk 9:7-9)

<sup>14</sup>Eroade Ruohdh giij tiihy Jeacuu ge alihnge. Nying Jeacuu anaa awiihj noono e akob nyoge mooge naa Jeacuu beehda Joon Ngad Luogwahy e naa acahr e naa giin nud yihre tee me tiihye giij me gaahy nyoge.

<sup>15</sup>Abea nyoge mooge kob gene, "Ngo beehda Eliija ngad agamloohngjuog naa acoon ge akob Juoge kea ngo uoohre." Kob nyoge mooge dahng naa ngo beehda agamloohngjuog me neehn yaa agamloohngjuog giij acoon ge na yug giij me gaahy nyoge.

<sup>16</sup>Abea mar Eroade cuohne kea Joon Ngad Luogwahy, e ngude anaa angole, e naa acahr.

<sup>17-18</sup>Eroade Ruohdh apahro wa giin nu bang giin anahg e naa aohr acaakere ne nahg Joon. Tien kaa anahg Joon athubo ke wa giin: Ruohdh Eroade yihre anaa umen me nyinge Pihlihb kedea Pihlihb yihre anaa ciihe me nyinge Eroada. Eroada abeehn Eroade ne tihngo ne ciihe. Cahng man e Joon Ngad Luogwahy Eroade acaye kea, "Giin e beehdi ke ciih umiihu abea umiihu kuu athow? Ngo amahn loohng Juoge ubeehn dhaane utihnge ciih umen." <sup>19</sup>Dhaar cuohn ne Eroada giin arob Joone ngo amaane maa akwaahdhe Joon. Noono cwihnye anaa bang unahge Joon abea dhe yooh atooro <sup>20</sup>bang giin Ruohdh Eroade, Joon na wuore wuoro bang giin ngo ngahye kejea Joon beehda ngaa me beer yi wong Juog. Abea keehd maano e Eroade acaakere aohre ne mag Joon ukedh gene ngo yi karkoohn. Eroade ke kur mare anhyaar lihng giij rob Joone abea ge lihng gen e aduune udoal keraahyo.

<sup>21</sup>Giin nu e Eroada abeehdo e cwihnye raaj keehd Joon. Cahng man e dhe yooh me nahge Joon ayoad. Cahng nu anahg cahng ayug Eroade yaay me duohng gihr par cahng anyuole. Yaa batiene maa jaabidhe kedea jo doong Gaalili ge anudo yi yaay. <sup>22</sup>Kaano e nyaar Eroada, abeehn nyum ruohdhe umiele umihn cwihny ruohdh maa weehle giiehang.

Kaano e Eroade a'aj maalo ke med cwihny nyum nyoge urube yihr nyaar Eroada kea, "Peehyi yihra ke kwaad giin beer yi cwihny, ucuba ngo yihri." <sup>23</sup>Maa akuohnge ree nyum nyoge kea, "Giin daahdi dhiila kaa cubo yihri keehd dhaahra e yea paahngo paahngo ke yihne e uroomo."

<sup>24</sup>Giin nu, e nyaar Eroada, agoohd bang men uteede giin atiihy ree yihre. Kaano e men apeehnye peehnyo kea, "Nahge giin e ne kwaya?"

Maa abeehr men ngo kea, "Teed ngo kejea yi daahd ungol ngud Joon."

<sup>25</sup>Kaano e nyaan aguo duuo uteede ngo yihru Ruohdh kea, "A daahd wiih Joon ukahle yihra awaahn kan e ne yi caan."

<sup>26</sup>Giin nu e Eroade Ruohdh cwihnye ake rahnyo kedea ukwaahdhe lum nu abea ka maa arome waar yea lum arobe umodho tooro bang giin ree akuonge nyum nyoge kedea wiihe ulaahyo ne waar yea lume nyum yaa amahdo. <sup>27</sup>Noono uguo Ruohdhe acaakere kaa oohro piow piow ne ci ne ngol wiih Joon oogo ne kahlo yihru nyaar Eroada. <sup>28</sup>Maa a'ay yaa acaakere ucidh gene yi karkoohn. Naa angol wiih Joon oogo e ngo akahl e ne yea caan ucube yihru nyaar Eroada. Maa akaab nyaar Eroada ngo ucube ngo yihru men. <sup>29</sup>Naa alihng jo waahdh Joone thone e ge abeehno ne kaab kuohme ne ci ne kano.

### Nyoge Alihbe Abiihj Ge Ayaahng Jeacuu Kaa Amune Me Noog

(Mat 14:13-21; Luk 9:10-17; Jon 6:1-14)

<sup>30</sup>Cahng man e jo oohr ge anaa amahdo bang Jeacuu naa aduu gene ke yoohn kuohn aohre gen yihdh gen. Ge anaa ne kwaan giij atiihy gene yihru Jeacuu. <sup>31</sup>Nyoge ge anaa athoohdho ne cohng adhaahr utoor giin maa arom ree tiihyo yihru Jeacuu kedea jo oohr. Keehd cam e ge kuu arom cam bang giin yaa muu ge ubeehno uaay gene aay udog yaaj mooge ke beehno wa giin nu. Naa aniid Jeacuu ngo kejea beehn nyoge bange be thum e arobe robo yihru joe kea, "Aayo oogo kan ucidho karo keedo ne yuohmo."

<sup>32</sup>Noono maa athub gene ke aay ke baabuur ne cidh kar keed gen ka me toor nyoge yea. <sup>33</sup>Abea ge kaa aniid nyoge me thoohdhe e ge uaay. Naa angej gene kun cidh gene yea, e nyoge ge apahdh yooh e ge kwany yihdh geedh dieng baaw ne ci ne kaang wudh gen. <sup>34</sup>Ge athub Jeacuu ke beehn oogo yi baabuur ne yedh wiih agala, e niid akuud nyoge me thoohdh rog gen acong gene. Kaano e Jeacuu cwihnye ake yuog yi ngoohng nying gen bang naa aniide gen wa diehg me ngad kwaag gen tooro. Uthube thubo ke puohny gen ke giij me thoohdh.

<sup>35</sup>Naa awahdhe ke thiehno e jo oohr ge abeehn bang Jeacuu urub gene yihre kob gene, "Ngad puohny kan beehda dom kedea piny ayuudho. <sup>36</sup>Giin e bahnge nyoge ge be meehgi aay ne cidho ke bang yihdh miehru ne daahd giin me cam gene?"

<sup>37</sup>Maa abeehr Jeacuu ngo yihru gen kea, "Maa cubo giin me cam yihru gen."

Maa abeehr gene ngo kejea, "Amahr ngiihny ge uyoad wane kee me rom ngeew cam me yaahng amahr jo ni?"

<sup>38</sup>Maa apeehny Jeacuu gen kea, "Giin e ne nud yihru ne cam? Cidhu ne maany piny ke giin me cam."

Naa acidh gene e ge ayoad amune abiihj kedea rej ariow cog. Maa aduu gene ne rob giij ayoad gene yihru Jeacuu kob gene, "Wa ayoad amune abiihj kedea rej ariow."

<sup>39</sup>Kaano e arobe robo yihru jo waahdhe kejea teed gene ngo yihru nyoge upiih gene piny naa akuude. Kaa ngo yea anaa lum me mar. <sup>40</sup>Maa apiih nyoge cang naa akuude. Akuude mooge yihdh ge ne nyoge jiehabiihj kedea mooge yihdh ge naa nyoge jiehariow wonge apaar. <sup>41</sup>Kaano e Jeacuu amune maa rej ge akaabe kaabo uloge wonge maalo ne muohj koohr Juog ke nying caame giij ni. Maa abanye yihdh amune ucube gen yihru jo oohr ne paahngo yihru nyoge. Yihdh rej ge apaahnge thioh kedea ucube gen yihru jo oohr. <sup>42</sup>Maa acahm nyoge cang uyahng gene. <sup>43</sup>Naa acong caam

adoohng piny e ge arom diide apaar wonge ariow me pahng. <sup>44</sup> Cuow acahmo ge anahg kar nyoge alihbe abiihj abea maahn kedea nyethen ge kuu akwaan.

### Kaa Acaahdh Jeacuu Ke Wudh Piih

(Mat 14:22-33; Jon 6:15-21)

<sup>45-46</sup> Piow piow batien gihn nu e Jeacuu ngo ateede teedo yihr jo waahdhe kejea paahr gene yi baabuur beere ge caa paan cuohn ne Beadhceada. Batien kaa awiihwe gen e ngo adoohng ne rob ngo yihr nyoge kejea dog gene miehy gen. Kaano e ake aay ucea wiih good ne kwaj.

<sup>47</sup> Ke thiehno e Jeacuu ne wiih agala e keede, e baabuur aniide yi diehr naam duohng. <sup>48</sup> Ge awahdhe kaa akaahg piny, maano e piny adoohng ne bahr bahr, e Jeacuu niid jo waahdh giihe e ge ubuohj keehd baabuur yi diehr naam duohng. Kiiw baabuur anaa adoohng teeg bang gihn yamo anaa acoohd e beehn kaa kun ci gene yea. Kaano e Jeacuu ake thubo ke waahdh ke wudh piih e caa bang gen udoohngge wa ubar ke buud gen. <sup>49</sup> Abee naa aniid gene ngo e ucaahdho ke wudh piih, e ge ke gaahy umaahr gene piny ke lalo cuohn gene kejea beehda atiihb ngaa maa athow e ne caahdh ke wudh piih, <sup>50</sup> bang gihn ngo aniid gene ke kar gen cang kedea umag lwahre gen.

Abee Jeacuu aguo rob yihr gen kea, “Deedu cwihnyu! Wu keá tud! Beehda a Jeacuu.” <sup>51</sup> Maa amone yi baabuur bang gen kedea uguo yame cuungo thiow. <sup>52</sup> Maa agaahy gene cang yi kwaad gihn me wa gihn nu, keehd maa anaa ayaahng Jeacuu amahr nyoge kaa amune abiihj cog. Ge agaahy bang gihn wudh gen aciehg rog gen utoor ka me dead gene yihdh giih tiihy Jeacuu.

### Nyoge Athiehdh Jeacuu Geneajared

(Mat 14:34-36)

<sup>53</sup> Kaa angol gene baaw e ge abeehn yi paajo me cuohn ne Geneajared <sup>54</sup> kedea uyihnh gene oogo yi baabuur. Ke wong kaano e Jeacuu aguo nyoge kaa ngeyo. <sup>55</sup> Noono uthub gene ke kahl nyoge me tuu bange ke bang yiehdh miehr beere ge thiehdhe thiehdho. <sup>56</sup> Kedea kwaad paan wale geen cea yea, e nyoge maa atwaany tihng bange ne piehl piny yi laaro yi cuug. Noono ukway gene wong ngo kwayo kejea keehd waahre kea meehge ngo gweelo yihr ngad atwaany. Amahr yaa agweel waahnye ge athiehdhe cang.

### Loohnge Giih Paarijea

(Mat 15:1-9)

**7** <sup>1</sup> Cahng man, e jo doong Paarijea kedea yaa loohng Juog maa abeehno ke yoohn Jeruucalem ge abeehn bang Jeacuu ne maany giih tiihye. <sup>2</sup> Naa awahn gene piny Gaalili e aniid gene kejea yaa waahdh Jeacuu cing gen be luog gene, wa ka ne kweehr yaa Judea ngo, nea ge caa ne cam. <sup>3</sup> Gih luog cing gen ke dhe yooh me padh kaa ateed loohnge ngo amaan yaa Judea maa Paarijea bang gihn yaa Judea kedea Paarijea cing gen luog gene luogo ke dhe yoohn arob loohnge. <sup>4</sup> Nea ngad Paarijea ngo uduo ke yoohn yi cuug e ngo be kuong cam e cinge keá luogo uwahdhe wong atiehl. Giih kweehr ge ke yugo thiow rog roohd kedea daahy wa kaa apuohny jo doonge ngo yihr gen.

<sup>5</sup> Kaano e yaa Paarijea kedea yaa loohng Juog, Jeacuu acay gene kob gene, “Gihn ge bahnge jo waahdhi yoohn ka beehd nyoge kii ngo yi paajo be wuor gene? Gihn ge cahm gene e cing gen be kuong gene ke luogo uwahdhe wong atiehl?”

<sup>6</sup> Maa abeehr Jeacuu ngo yihr gen kea, “Wa gihn anaa arob Yicaaye coon umodho ke nyingu wu yaa waal ngo dhiil nahg athiir! Anaa agweede kejea Juog akoohbo kea,

‘Yaa ni a wuor gene kaa leehb gen now  
abea aduun gen tooro banga.

<sup>7</sup> Beehda toohd now

keehd me koohb gene kejea ge wuor an.

Noono ge piih ne puohny loohnge me yoad gene ke bang nyoge  
abea ge padh loohnge giiha.’

<sup>8</sup> Loohnge giih Juog ge alogu ngahdhu unahge ke puohny ge kuowu e naa adeehju yi koohdhu.

<sup>9</sup> “Wu nyoge me nyingu teeg ne cohg. Wu ge alog loohng Juog ngahdhu unahge ke loohnge maa now ge naa adeehju yi koohdhu! <sup>10</sup> Yihdh loohng Juog acielo anudo maa anaa arob Moaje kejea arob Juoge kea,

‘Wuor wuru ge ke miihu.

Ngaa rob gihn me raaj rih wahn wale men  
e ngo ke naah.’

<sup>11</sup> Abee nea dhaano urubo yihr wahn wale yihr men kea, ‘Gihn arob loohnge kejea dhiila ngo ke cubo yihri, ngo acuba piny ke nying lum Juog,’ <sup>12</sup> e ngaan nu lume yiihu yiiho noono e dhe yooh me rome wahn kedea men ke konyo ngo tooro. <sup>13</sup> Ke dhe yoohn nu, e lum Juog naa arobe kejea wuor dhaane wahn kedea men yea awuouju piih ke nying gihn arobu kedea ke nying kwaad mooge me yugu thiow.”

### Gihn Yug Dhaano Ne Ngaa Me Beer Wale Ne Ngaa Me Raaj

(Mat 15:10-20)

<sup>14</sup> Maa adog Jeacuu nyoge ke cuohn bange urube yihr gen kea, “Yaage! Lengu ne caaj ulihngu gihn teeda yihru.

<sup>15</sup> Beehda aduulo e ne nyoadh ngo kejea dhaano beehdo kaa beehdo me nhyaar Juoge wale beehdo kaa beehdo me maan Juoge. Padh cam ge cam dhaane e ne meehg ngo doohng ne ngaa me raaj yi wong Juog, abea beehda lum

beehn oogo yi dhe dhaano kedea gihn tiihye e ne meehg ngo doohng ne ngaa me beer wale ngaa me raaj yi wong Juog. <sup>16</sup> Lihngu giih ni nea ngaa yihdhe nud me lihngo e kea lihngge.”

<sup>17</sup> Kaano e abeehn ne aay bang nyoge ucea wod, maa apeechny jo waahdhe ngo ke lum yihdh ucaale giih ateede.

<sup>18</sup> Maa abeehre ngo yihr gen kea, “Keehd wun thiw, yihdh luube ka ge kuu adeadu wa mar nyoge mooge? Ngo be niidu ne, kejea cam me ci yi yey dhaano, dhaano be yuge udoohnge ne ngaa me raaj yi wong Juog ne? <sup>19</sup> Bang gihn cam ge cam dhaane, be ci ne beehdo yaa aduulo, abea caa yi yej kedea ubare oogo.” [Lume noono arobe ateed ngo kejea kwaad nyepiny cang ngo beer ke camo.]

<sup>20</sup> Maa akoohb Jeacuu kea, “Gihn ne yaa aduun dhaano, ge pare ni kedea urobe ngo, e naa gihn yug dhaano ne ngaa me raaj. <sup>21</sup> Bang gihn aduulo, e ne beehn kwaad par me raaje oogo yea, wa mahj kedea kahw kedea kaab ciuh ngaa moogo maa nahg dhaano. <sup>22</sup> Log cwihny rih gih ngaa moogo, tiihy giih maa cwaahne, maa yug giih waal rog nyoge, maahr, waaj nyoge, beel, kedea yug giih tooy wihj kedea ngaa me wihj awaadh oogo ree. <sup>23</sup> Giih nu cang ge aay ke yaa aduulo kedea ge ne meehg dhaano doohng ne ngaa me raaj yi wong Juog.”

### Nyethiin Dhaar Peaniihcya Athiehdh Jeacuu

(Mat 15:21-28)

<sup>24</sup> Batiene e Jeacuu ake thubo ke waahdh ne ci yi geen Taayr kedea geen Ciihdoan ubeehde kaano e be daahd ngo unghy kare. Abea keehd maano e kare adhiil nyoge ke yoado. <sup>25</sup> Kaano piow piow e dhaago me nyethiine ree naa atiihb raaj, bang Jeacuu abeehne ne lihngo. Gihn nu e ngo ake a'aay ne ci bang Jeacuu. Naa awahdhe e cunge arunge ke piny umuune ne ci bang Jeacuu. <sup>26</sup> Dhaar ngo anahg nye Griihg maa anyuol yi geen Peaniihcya ge ne yi piny Ciihrya. Kaano e wong Jeacuu akwaje beere atiihb raaj rieme ke oogo rih nyaare.

<sup>27</sup> Maa arub Jeacuu yihr dhaar ni kea, “Nyethen paajo ge ne kuong ke muojo ke cam umodho, bang gihn ngo be beer ukaab cam nyethen ucube yihr goohy.”

<sup>28</sup> Maa abeehr dhaar ni ngo kea, “Lumi adiehr Ruohdh! Abea goohy, ngahda giih na doohng piny bang nyethen ge na ke cubo yihr gen ne camo?”

<sup>29</sup> Maa arub Jeacuu yihre kea, “Ke nying robi noono, doogi e cwihnyi med bang gihn nyethiini atiihb raaj a'aay oogo ree.”

<sup>30</sup> Kaano e dhaar ni ake thubo ke aay ne ci paare maa ayuude nyethiine e uneno beer mee kedea atiihb raaj a'aay oogo yi kuohme.

### Miing Athiehdh

<sup>31</sup> Kaano e Jeacuu adoog ke Taayr ne ci naam duohng gih Gaalili. Ngo acidho e ngo kaahn bang Ciihdoan kedea wudh Geedhe Apaar. <sup>32</sup> Maa abeehn nyoge ukahl gene ngaa maa amiing me be rubo yihre maa akway gene wong ngo kejea cube cinge wihe ne thiehdh ngo.

<sup>33</sup> Kaano e Jeacuu ake a'aay ke nyin ucidh gene kar keed gen, ka me nyoge tooro yea. Gihn nu e cinge acube yi yihdh nyin kedea ugweele leeb nyin. <sup>34</sup> Kaano e amaahny maalo ce yiihe ne puu naa aniide ngoohng wong nyin. Batiene e arubo ke dhog yaa Judea kea, “Ebpata” (lum yea yahb gene). <sup>35</sup> Ke wong kaano e yihdh nyin ake yahbo ugoony leebe ree uthube ke rob beer mee.

<sup>36</sup> Maa acuow Jeacuu jo aniid gihn atiihye kejea ngo kea rob gene oogo yihr nyoge. Abea ngo kuu alihng gene, udoohnge wa ateed ngo yihr gen kejea keedh gene gihn atiihye ke bang wiuh piny cang. <sup>37</sup> Gihn nu e nyoge ge acwaahng keter naa alihng gene gihn atiihy ree. Maa akoohb gene, “Giih tiihye cang ge beeye kedea gihn me riehy yihre tooro. Keehd ngaa maa amiing wale ngaa me kar rob tooro yihre e rome kaa thiehdho ke dhog yiehdhe giihe noono yuge giih me gaahy nyoge.”

### Jeacuu Nyoge Alihbe Angween Ayaahng Kaa Amune Abiihberiw

(Mat 15:32-39)

**8** <sup>1</sup> Yihdh ni nu keehdo e amahr nyoge rog gen anaa adog gene ke congo ke batien Jeacuu. Nihn adahg e ge buodh batiene! Gihn nu, e caame giih anaa yihr gen ge ake thumo. Naa aniide kahj rog gen e jo waahdh giihe acuhne bange urube yihr gen kea, <sup>2</sup> “Yaa ni aduuna uyuog ke nying gen bang gihn yihr gen ne nihn adahg awaahn ni e gihn maa agweel gene yi dhog gen ngo tooro. <sup>3</sup> Abea nea ge meehgo ke aay ke kahj rog gen, e ge caa ne pahdh yi yooh bang gihn nyoge mooge kiin gen ge beehn ke kuohn me bahye.”

<sup>4</sup> Maa abeehr jo waahdhe ngo yihre kob gene, “Amune me yaahng amahr jo ni ge uyoado ke kee yi ukang kan?”

<sup>5</sup> Maa acahge piehj kea, “Yihru naa amune adiih?”

Maa abeehr gene ngo kob gene, “Abiihberiw!”

<sup>6</sup> Maa arobe ngo yihr gen kejea meehg gene nyoge piih piny. Kaano e amune giih ni ge akaabe kaabo maa amuhje koohr Juog kedea ubanye yihdh gen noono uthube ke cub gen yihr jo waahdhe ne paahngo yihr nyoge. <sup>7</sup> Thiw yihr gen anaa nye rej me noog. Maa acahng Jeacuu gen ke kaabo kedea udooge gen maa ucube gen ne paahngo yihr nyoge.

<sup>8</sup> Maa cahm amahr yaa nu cang uyahng gene. Goan caame giih adoohng ge apaahng kar diide abiihberiw. <sup>9</sup> Yaa anaa acahmo cang ge anahg kar nyoge alihbe angween. Kaano naa athum nyoge ke cam e ge ameehge ke aay <sup>10</sup> kedea upaahre kii baabuur keehd jo waahdhe ne ci paan cuohn ne Dalmanuudha.

## Paarijea Ge Daahd Jeacuu Uyuge Gihn Me Gaahy Nyoge

(Mat 16:1-4)

<sup>11</sup> Yihdh nihn apoohde e Jeacuu nud kaano e yaa Paarijea mooge ge abeehn bang Jeacuu urub gene ke luub waal ne tum ngo kejea yuge gihn me gaahy nyoge ne nyoadh ngo kejea Juog e naa aohre. <sup>12</sup> E Jeacuu ayiih maalo e atheng maa acoare ukoohbe kea, "Wu yaa ni rubo kan ni, gihn me gaahy nyoge me yuga yihru ngo gihn? A rob athiir yihru, gihn me gaahy nyoge me yuga ke nyingu tooro." <sup>13</sup> Maa awiie gen piny uaaeye keehd jo waahdh giie ucea ne paahr yi baabuur ne ngud loo baaw.

## Gihn Arob Jeacuu Ke Nying Paarijea Kedea Eroade

(Mat 16:5-12)

<sup>14</sup> Gihn nu e jo waahdh ka wudh gen anaa awul ne kaahn amune kedea unahge kaa amono acielo cog e naa anudo yi baabuur. <sup>15</sup> Kaano e Jeacuu ake thubo ke rob yihr gen ke luub ucaale me toohn gen ubahng kwaad giie reje ge par yaa Paarijea kedea yaa batiene Eroade ge be tiihy gene kobe, "Giie nu reje ge par gene ge uroomo keehd nye kamiira gihn woj yi mog amono uyaahnye."

<sup>16</sup> Maa athub gene ke rob ke rog gen cuohn gene kejea ka moogo e ngo rubo kaa nying amono, kob gene, "Ngahda ngo rubo kaa nying gihn toor amune yihro!" <sup>17</sup> Kaano e gihn rob gene aguo Jeacuu kaa ngye uthube ke piehj kea, "Wu rob gihn ke nying tooy amune? Ka poohd e ngo be ngye kejea amune roma kaa kahlo ke yooh me gaahy nyoge? Wudhu ka poohd kuu ayahbo ne ngye nyepinye?" <sup>18</sup> Kuu anaa aniidu kedea kuu alihngu, nea padh wul wih e naa awul wudhu kaa anaa ayaahnga nyoge alihbe abiihj kaa amune abiihj adhaahr ugaahy nyoge?"

<sup>19</sup> "Naa abanya yihdh amune abiihj yihr nyoge alihbe abiihj ne camo, wu anaa acong adiide adiih me pahng keehd amune giie adoohng piny?"

Maa abeehr gene ngo kob gene, "Apaar wonge ariow."

<sup>20</sup> Maa acahge rob kea, "Naa abanya yihdh amune abiihjberiw ne camo yihr nyoge alihbe angween e adiide adiih ge naa apahng kaa amune giie adoohng?"

Maa akoohb gene, "Abiihjberiw."

<sup>21</sup> Kaano e wiih robe agooye piny kobe, "Ngo poohd kuu angeyu kejea a kuu arubo kaa nying amune? A arubo kaa nying dhe yoohn ka pahr yaa Paarijea kedea yaa tiij giie Eroade kii ngo."

## Jeacuu Ngaa Maa Acoor Athiehdhe Yi Paan Cuohn Ne Bedhceada

<sup>22</sup> Batiene e ge acahg beehd ne duuo yi Bedhceada. Nyoge mooge dhaano maa acoor ngo akahl gene bang Jeacuu, ukwaj gene wong ngo kejea gweele ngo uthiehdhe ngo. <sup>23</sup> Kaano e bad ucuor amage mago upieye ngo oogo kiin nyoge ucidh gene kar keed gen. Kaano e anguud yi wong nyin batiene e cinge acube wiih ngo ce peehnye nyin kea, "Ne gihn me niidi ne?"

<sup>24</sup> Maa amaahnye maalo ukoohbe kea, "Ayiih! Nyoge ge uneehno yihra ne yihr yih e ge ucaahdho abea adoohng wa yen ge ne caahdh."

<sup>25</sup> Maa acahge cinge ke wum yi wong nyin, kaano e wonge anaa weehny uneehn nyepinye yihre cang keehd gihn me ne ka me baahr. <sup>26</sup> Kaano maa arub Jeacuu yihre kea, "Ge aayi kan, yih kea doog ke Bedhceada ne rob gihn ayug ree rihi." Batiene e ngo aohre ke paajo.

## Gihn Arob Piihtere Ke Nying Jeacuu

(Mat 16:13-20; Luk 9:18-21)

<sup>27</sup> Batiene e Jeacuu maa jo waahdhe ge abeehn ne aay Bedhceada, ne ci yihdh mieh giie piny Cejearya Pihlihi. Kaano acaahdh gene caahdho nu, e jo waahdh giie ge apeehnye peehnyo kea, "Nyoge wudh ge par gene kejea a ngaa?"

<sup>28</sup> Maa abeehr gene ngo yihre kob gene, "Nyoge mooge kob gene yih beehda Joon Ngad Luogwahy, e naa acahr, kob nyoge mooge kejea yih beehda Eliija e naa aduuo ke yoohn maalo kedea nyoge mooge thiow naa yih beehda agamloohngjuog maa anaa anudo upiny umodho."

<sup>29</sup> Maa acahge gen ke peehnyo kea, "Abea nea maru, kobu a beehda ngaa?" Maa abeehr Piihtere ngo kea, "Yih beehda ngaan aohr Juoge ne Ngad Boadh nyoge."

<sup>30</sup> Maa abeehr Jeacuu ngo kea, "Lumi athiir Piihter. Abea lum nu kea teedu yihr nyoge kejea a beehda Waahd Juog naa aohre ne boadh nyoge."

## Gihn Arob Jeacuu Ke Nying Thone

(Mat 16:21-28; Luk 9:22-27)

<sup>31</sup> Batiene e ake thubo ke puohny gen kea, "A ke nguda a ge adoohng ne dhaano utaahngo, giie raahm me thoohdh ge uyoada, jo doonge maa jo doong yaa lam kedea yaa loohng Juog ge ukweer kejea a padh Ngad Boadh nyoge uwahdhe ka unahg an. Abea yi dahg nihn e a ucahr keehdo." <sup>32</sup> Lum nu ngo arobe yihr gen e gihn maa akane tooro. E Piihter bad ngo amage ne nyiig oogo buud nyoge maa arube yihr Jeacuu kea, "Gihn ge rubi wa maan ni?"

<sup>33</sup> Kaano e ngahye aloge umaanye bang jo waahdhe maa acuowe Piihter kea, "Yih atiihb ukeehg coor rihi oogo buuda. Yih kea pahro ke kwaad par gihn nu, bang gihn giie pari ge padh giie par Juoge abea ge beehda giie par dhaano utaahng."

### Gihn Tiihy Ngaa Daahd Buodh Batien Jeacuu

<sup>34</sup> Nyoge kedea jo waahdh giibe ge acuohne bange maa arube yih gen kobe, “Nea ngaa daahd ubuodhe batiena, kea jaahe ree uguume giib raahm kuohm wa mara, ce beehne ubuodhe batiena arumo.” <sup>35</sup> Kwaad ngaan kweer ke buodh batiena bang gihn be daahd uthowe e ngaan nu kuowo me guge tooro buu uyoade. Abea kwaad ngaan be dier ke thoo ke nyinga kedea ke nying Ciig Beer e ngaan nu kuowo me guge tooro uyoade. <sup>36</sup> Gihn e ne kony giib wiib piny yih dhaano utaaingo nea boadh wahy be yoade? <sup>37</sup> Gihn muu urom dhaane ke cubo me room ke wahye tooro. <sup>38</sup> Ngaa beed wiib piny ge yea apahng ke giib anyoohne, nea wiibe ulaahyo riha kedea yih gihn roba e, wiiba ulaahy thiw ree cahng uduua e a kaahn teeg Wura kedea e a kaahn wuohdjuoge kaahno kii diehr.”

**9** <sup>1</sup> Maa arub Jeacuu yih gen kea, “A rob athiir yihru. Yaa nud kan ge buu uthow cang, nud ke nyoge kiin gen muu uniid Ruohdh Juog ke nying gen ge ubeehn Waahd Juoge ke tee ne kihm nyoge.”

### Jeacuu Kuohme Ree Aloge Keehd Teeg Wahy Juog

(Mat 17:1-13; Luk 9:28-36)

<sup>2</sup> Batien niin abiihbeciel e Piihter maa Jeamij kedea Joon ge abeehn Jeacuu ne kedh wiib good me duohng mee. Ge awahdh gene wiib good kar keed gen, e ka nahg Jeacuu ngaa me yihre ne tee abeehn gene ne niido. Aniid gene bang gihn kuohm Jeacuu ree abeehne ne loo nyum gen. <sup>3</sup> Waaye ge ake liel tar ne weeje ke kwaad geed me kuu akuong ke niido wiib piny kan. <sup>4</sup> Kaano e nyoge ariow, Eliija maa Moaje ge anaa alwaahd ke dhe yooh maa agaahy gen kedea uthub gene ke rob ke Jeacuu.

<sup>5</sup> E Piihter ake rubo yih Jeacuu kea, “Ngad puohny. Ngo beer ubeehdo kan. Nea wa gihn nu kea wii wan ugeer wane abuwe adahg. Acielo yihri maa acielo yih Moaje kedea acielo yih Eliija.” <sup>6</sup> Piihter arubo wa maano bang gihn gihn maa angahye me robe ne cohng ngo atooro kedea ge anaa anahg lwahre.

<sup>7</sup> Kaano e deeh lwahd abeehn ne niim wudh gen kedea e yedh duon Juog ulihngo e ngo urubo kobe, “Gihn e naa Waahda maa anhyaara. Lihngu lume beer mee.”

<sup>8</sup> Ka me thiin kaano, e lwahd anaa aweehny abea ge amaahny gene e ngaa maa acahng gene ke niido me cuung buud Jeacuu tooro.

### Rob Ke Nying Eliija

<sup>9</sup> Naa aduu gene e ge loohn piny ke wiib good e ngo arob Jeacuu robo yih jo waahdh giib adahg kea, “Gihn aniidu kea robu yih nyoge uwahdhe cahng uahra batien thoo.” <sup>10</sup> Adiehr muon gihn nu kuu abeehn gene ne teedo yih nyoge wa kaa arobe ngo. Abea gihn anaa adhiehdh wudh gen beehda lum ni arobe kea, “Uwahdhe cahng uahra batien thoo.”

<sup>11</sup> Kaano e Jeacuu abeehn gene ne peehnyo kob gene, “Yaa gweed ge na upuohnyo kejea Eliija e nuu ukuong beehn wiib piny umodho kedea ubeehn Ngad Boadh nyoge ke batiene. Puohny gen noono beehda kare ne cohng?”

<sup>12-13</sup> Maa abeehre ngo yih gen kea, “Athiir muon anaa arob Juoge kejea Eliija ukuong ke oohro ne nyoadh dhe yoohn ka gwiir nyoge rog gen umaan gene anyoohne giib gen ke nying cahng unyoada riha a ge adoohng ne dhaano utaaingo. Kedea ngo adiehr thiw kejea Eliija ngo abeehno kedea ngo aniidu e kaa akaahne kii ngo uwahdhe kaa anahge wa kaa anaa agweed yaa agamloohngjuoge ngo coon. Kea deadu yi man: agweed yaa gamloohngjuoge thiw kejea jo doonge ge ukweer ke yiib an kejea Juog e naa aohr an ne ngade me boadh nyoge kedea ge upiib uyug gene giib ajohr riha maa ucwiid gene kuohma.”

### Kaa Athiehdh Jeacuu Nyethiin Me Wiibe Ne Juu

(Mat 17:14-21; Luk 9:37-43a)

<sup>14</sup> Naa awahn Jeacuu, tiehd kehd jo waahdh giib acaahdho keehde bang jo waahdh giib anaa adoohng, e ge ayuud gene e ge atieg amahr nyoge piny. Yaa loohng Juog ge anudo thiw, e ge upeehmo ke kiin gen ke nying luube giib arob gene robo. <sup>15</sup> Nye kaa aniid nyoge Jeacuu e ucaahdho tiehd kehd jo waahdh giibe adahg e apahdh yi cwhny gen kedea uthub gene ke goohd bange ne maahdh ngo.

<sup>16</sup> Naa awahn Jeacuu bang jo waahdh giib adoohng e ge apeehnye kea, “Wu peem gihn kehd jo ni atieg wun piny?”

<sup>17</sup> E dhaano acielo kiin gen ngo abeehre beehro kea, “Ngad puohny! Nyethiina akahla yihri ne thiehdho bang gihn yihre ne atiihb reje me ngo be meege rob. <sup>18</sup> E tahng ree, e ngo riedhe ke piny kedea dhe upahngo kaa aboohyo me ne thug thug maa lage kaanye kaanyo kaano e ngo tal oogo. Maa aroba ngo yih jo waahdh giibi ge adoohng kan kejea thiehdh gene ngo. Maa ariehnye ke thiehdho yih gen!”

<sup>19</sup> Maa abeehr Jeacuu ngo kobe, “Wu kwaad nyoge me yiho tooro yihru? Wudhu paru paro kejea a ubeehdo ke wun uwahdhe weehne? Kahlu nyethiin ngo yihra kan.”

<sup>20</sup> Kaano e nyethiin akahl yihre. Naa aniid atiihb reje Jeacuu, e nyethiin ariedh gene ke piny e ree urihgi kedea uruj gene ngo ke piny e dhe apahng kaa aboohyo. <sup>21</sup> Kaano e Jeacuu wur nyethiin apeehnye peehnyo kea, “Gihn ni athubo ree ke weehne?”

Maa abeehr wur nyethiine ngo kea, “Ke kaa anyuole nyuolo <sup>22</sup> kedea ngo na thoohre kii maaj maa yihdh piib e miid ngo ke naah! Abea nea kar konye nud yihri kea dhiil ngo ke konyo yih wan cedhree!”

<sup>23</sup> Kob Jeacuu yih wur nyethiin kea, “Gihn ge koohbi kejea kar konye nud. Kar konye beehde nud nea yih ayiho.”

<sup>24</sup> E ngo aguo wur nyethiine kaa gamo piow piow maa atihngge duone maalo kea, “Lum Juog ayiha. Abea kony an beere yiho gihra yea be lwag ree.”

<sup>25</sup> Jeacuu e niid akuud nyoge beehn bange ke ngweej, e atiihb reje ge anaa yi kuohm nyethiin ni acuowe cuow kobe, “Wu atiihb reje, ge miing nyoge! Pahru oogo yi kuohm nyethiin ni kedea wu keá cahg duuo keehdo.”

<sup>26</sup> Gihn nu e nyethiin ariedhe ke piny e ree urihgi keter e uyuog keter kedea ree ruye ruyo ke piny. Kaano e atiihb reje ge ake aay uwii gene nyethiin piny wa ngaa maa athow. Mar nyoge mooge cuohn gene e ngo athow. <sup>27</sup> Abea ngo abeehn Jeacuue ne maa ke bade utihnge ngo maalo maa ayedhe maalo ucuunge wudh tiene e ngo adoohng beer kedea gihn me ne ree tooro.

<sup>28</sup> Naa amon Jeacuue wod keehd jo waahdh giihe, e ngo apeechny gene peechny kob gene, “Gihn ge toor tee yihr wan ne riem atiihb ukeehg oogo?”

<sup>29</sup> Maa abeehr Jeacuue ngo yihr gen kobe, “Kwaad man padh gihn me riem ree oogo now nea padh ke dhe yoohn kwaj.”

### **Riown Rob Jeacuu Ke Nying Thone**

*(Mat 17:22, 23; Luk 9:43b-45)*

<sup>30</sup> Maa a'aay Jeacuue keehd jo waahdh giihe kaano, ucidh gene ke bang Gaalili. Jeacuu kuu adaahd unghy ka cea yea, <sup>31</sup> bang gihn Jeacuu jo waahdhe ge apuohnye puohnyo. Noono maa arube yihr gen kea, “Beeh teeda ngo yihru yaage. A ge adoohng ne dhaano utaahngo, a uluom ucub an yi cing nyoge me reje ne naah abea yi dahg nihn e a ucahr.” <sup>32</sup> Gihn adaahde ke teedo yihr gen yea ngo kuu adead gene abea ge atud ke peechny lum yea.

### **Nгаа Wiihe Ne Maalo**

*(Mat 18:1-5; Luk 9:46-48)*

<sup>33</sup> Kaano, e ge abeehn Kaparnaam. Naa apiih gene yi wod, e Jeacuu jo waahdh giihe ge apeechny peechny kobe, “Wu apeechny gihn ge acaahdhu caahdho?” <sup>34</sup> Gihn nu ge aleng bang gihn wudh gen alaahyo, bang gihn ge anaa acaahdh gene caahdho, e ge anaa ake peechny ke kiin gen kejea ngaa e nu nahg ngaa duohng nyum gen.

<sup>35</sup> Maa akob Jeacuue ngo kejea nyiihng joe ge apaar wonge ariow buude. Noono maa arube yihr gen kea, “Nea ngaa daahd unahge e naa ngaa duohng nyum nyoge kea ngahye ngo kejea e naa ngaa me thiin mee me e ne tiihyo yihr nang.”

<sup>36</sup> Kaano e nyethiin amage maa ameehge ngo cuungo yi diehr kiin gen, batiene e ngo atihnge yi koohre maa athube ke rob yihr gen kea, <sup>37</sup> “Kwaad ngaa beehdo beer keehd nyethiin me wa nyethiin ni e ngaan nu uroomo wa ngo abeehdo beer kaa an, padh an keede abea ngo uroomo wa ngo abeehdo beer kaa ngaan aohr an.”

### **Ngaan Padh Ngad Mahn Keehd Won Beehda Ngado**

*(Luk 9:49, 50)*

<sup>38</sup> Joon arubo yihr Jeacuu kea, “Ngad puohny! Ngaa moogo ayoad wane e atiihb ukeehg ge rieme ke oogo yi wudh nyoge e nyingi e ne cuohne. Abea bang gihn padhe ngado e ngo amahn wane kejea atiihb ukeehg keá rieme oogo yi wudh nyoge.” <sup>39</sup> Maa abeehr Jeacuue ngo yihre kobe, “Ngo keá mahnu! Bang gihn ngaa maa ayug tiihy gihn me gaahy nyoge me neehn gihn nu ke nyinga kare tooro me cahge gihn me raaj ke robo yihr nyoge ke nyinga <sup>40</sup> bang gihn kwaad dhaano me be yug gihn me raaj rogo, ngo beehda ngado. <sup>41</sup> Adiehr e ne roba yihru kejea kwaad dhaano me cub nyepiny keehd me nahge piih maadh yihru ke nyinga bang gihn nahgu jo'a, a ge Ngad Boadh nyoge, e ngaan nu akoohg gihre bang Juog be rwaahny. Arob athiir yihru, ngo dhiile kaa yoado.

### **Gihn Kedh Dhaano Yihdh Giih Me Reje Ngo Dhiile Kaa Wii**

*(Mat 18:6-9; Luk 17:1, 2)*

<sup>42</sup> “Kwaad ngaa meehg nyethiin wii luma maa ayiihe, e ngweehn me tuohj deeh leelo yi ngud ngaan nu uthoohre yi naam duohng. <sup>43</sup> Nea cingi e ne meehg yihng yug adhemuohm e kea ngol ngo oogo, bang gihn ngo ngweehn ucii Paar Juog ke cing acielo maa atug, yi man cii paar maaj ka me maaj be thow yea ke cing ariow. [<sup>44</sup> Ka me kuuno gihn cam nyoge yea be thow kedea maaj gihn waang nyoge be lan oogo] <sup>45</sup> Nea tieni e ne kedh yihng yihdh giih me reje, e kea ngol ngo oogo, bang gihn ngo ngweehn ucii kar wahy e tieni atug, yi man cii paar maaj ke tiene ariow. [<sup>46</sup> Ka me kuuno gihn cam nyoge yea be thow kedea maaj gihn waang nyoge be lan oogo.] <sup>47</sup> Nea wongi e ne meehg yihng yug adhemuohm, kea oohl ngo oogo, bang gihn ngo beer ucii Paar Juog ke wong acielo, yi man thoohr yih yi maaj ke nyingi kar ge ariow.

<sup>48</sup> Ka me kuuno gihn cam nyoge yea be thow

kedea maaj gihn waang nyoge be lan oogo.

<sup>49-50</sup> “Wa ka yoad melo ge beer uthaale ke maaj, wa gihn thiow e kwaad dhaano cang ngo ucub wiih maaj ne kahl gihn beer oogo ree. Abea nea melo ngo ubahnho e kare tooro ucahge lawo. Nea maano kea beehdu beer ke kiinu kedea ke doohr e kiinu tooro ater.”

### **Lum Paah Keehd Dhaago**

*(Mat 19:1-12; Luk 16:18)*

**10** <sup>1</sup> Batiene e Jeacuu ake a'aay keehd jo waahdhe yi geen Kaparnaam, e ge acor yihdh miehy Judea unghy gene loo naam Joohrdoan. Naa aniide ngo e batiene acahg akuud nyoge me thoohdhe ke buodho, e apiih ne puohny gen wa kwaad ka ne puohnye nyoge.

<sup>2</sup> Kaano e yaa Paarijea mooge me daahd ngo ke tumo beere dhe uwaahj ke nying paah ke dhaago, ge abeehn bange maa apeechny gene kob gene, “Dhe yoohn paah ke dhaago maa arob loohng Moaje nud ne?”

<sup>3</sup> Maa apeechny Jeacuue gen thiow kobe, “Moaje anaa arob gihn yihr ge kuowu ke nying gihn nu?”

<sup>4</sup> Maa abeehr gene ngo kob gene, “Akob Moaje kea, ‘Nea dhaano warga gihr paah cube cubo yihr ciie, e nyoadh ngo kejea ge apaah.’”

<sup>5</sup> Batiene e kob Jeacuu yihr gen kea, “Anahg gihn anahgu nyoge me wudhu teeg keraahyo e naa agweed Moaje loohng giih nu yihru. <sup>6</sup> Neehn kaa agweede yi kitaab Juog, ‘Juog acag dhecuow kedea dhaago.’ <sup>7</sup> ‘E naa gihn beehn dhe cuowe udage oogo paar gen unweehde ke ciie <sup>8</sup> udoohng gene ne dhaano acielo.’ <sup>9</sup> Nyoge maa anweehd Juoge udoohng gene ne dhaano acielo, keá ngaa paahng keew gen.”

<sup>10</sup> Naa adog gene paajo uci gene yi wod, e Jeacuu acahg jo waahdhe kaa peehnyo ke nying paah ke dhaago. <sup>11</sup> Maa arube yihr gen kobe, “Ngaa riem ciie kedea unyuome dhaago moogo, e ngaan nu ayug adhemuohm rih ciie ge anaa umodho muu uroomo kaa adhemuohm gihr ngaa maa akaab dhaago maa anyuom. <sup>12</sup> Kedea ngaa paah ke cuore unyuome dhecuow moogo e awuohj ayuge nyum Juog rih cuore ge anaa umodho ni.”

### Jeacuu Nyethen Me Thene Adooje

(Mat 19:13-15; Luk 18:15-17)

<sup>13</sup> Cahng man e nyoge mooge nyethen me thene akahl gene ke bang Jeacuu beere ge beehne ke ne doojo. Maa abeehn jo waahdhe upiih gene ne gahl nyethen oogo beere ge be cidh ne yihny guohb Jeacuu. <sup>14</sup> Gihn nu e Jeacuu cwihnye ake rahnyo ge aniide nyethen e ge gahl oogo ne beehn bange. Maa akobe ngo yihr gen kea, “Ge keá mahnu! Weehgu gen beehno, bang gihn kwaad nyoge maa ayiiho kedea me gaahn Juog me neehn nyethen ni ge ne wudh gen ne maalo Paar Juog. <sup>15</sup> A rob athiir yihru, ngaa me be lor Juog ke cwihnye cang wa ka lore nyethen, e Paar Juog be kuonge ke yoado.” <sup>16</sup> Maa atihng nyethen yi koohre kedea ucube cinge wudh gen ne dooj gen.

### Rihj Maa Alony

(Mat 19:16-30; Luk 18:18-30)

<sup>17</sup> Cahng man e Jeacuu ake caahdho ke jo waahdhe ne ci Jeruucalem e dhaano ake rihngo bange urunge cunge piny nyum ngo upeehye kobe, “Yih ngad puohny me beer! Gihn e ne roma ke yugu beere kuowo me ne cohg yoado yoado Paar Juog?”

<sup>18</sup> Maa abeehr Jeacuu ngo kea, “Gihn ge cuohni an ne ngad puohny me beer? Bekihd ngaa me beer, nea padh Juog keede. <sup>19</sup> Loohng Juog naa acube yihr Moaje ngahda ge ngahyi ne? ‘Dhaano keá nahgi, ciie ngaa moogo keá kaabi, gihr ngaa moogo keá kwali, yih keá rubo ke toohd, gihr dhaano keá camí ke waal, wuor wuru ge ke miihu.’”

<sup>20</sup> Maa akoohb nyine kea, “Ngad puohny! Giih nu ge athoba ke yugo e a poohd beehda nyethiin.”

<sup>21</sup> Kaano e Jeacuu amaahny bange e cwihnye med maa akoohbe kea, “Nyepiny acielo cog e naa adoohng e ngo kuu atiihyi. Do paajo ungeewi giihi ne nud yihri oogo cang kedea ukaabi ngiihny ayoadi upaahngi gen yihr nyoge maa angooohng beere giih lonyo ge yoadi ke Paar Juog kedea ubeehni unahgi ngad batiene. Nea giih nu ge atiihyi cang, e kuowo me ne cohg romi kaa ayoado Paar Juog.”

<sup>22</sup> Abea naa alihng nyine rob nu e ree ane kuohj bang gihn cwihnye atooro upaahe ke lonye. Noono upahdhe yooh ne aay e cwihnye arahnyo bang gihn ngo beehda ngaa maa anaa alony keraahyo.

### Lonyo Kahl Gihn Me Raaj

<sup>23</sup> Kaano e Jeacuu wonge aloge ke bang jo waahdh giihe maa akoohbe yihr gen kea, “Ngahyu ngo kejea ngaa maa alony ci yi Dhaahr Juog teeg yihre ubare.”

<sup>24</sup> Jo waahdhe ge acwaahng yi kwaad lum nu. Maa abeehn Jeacuu ubare maalo ke rob kea, “Yaage! Dhe yoohn Paar Juog ngo diiny keter yihr yaa lonyo ne mon kii ngo. <sup>25</sup> Adhaahr ngweehn roab amana yi libra wa mar libra ke keadh yihr mar yaa alony ne mono Paar Juog.”

<sup>26</sup> Gihn nu, e jo waahdhe ge acahg cwaahng yi kwaad rob nu maa arub gene ke kiin gen kob gene, “Nea neehn maano e unahg ngaa e nuu urom boadh?”

<sup>27</sup> Maa amaahny Jeacuu bang gen urube kea, “Ngo beehda athiir. Ree be rome ke leehwo yihr dhaano e keede abea nea ke teeg Juog e ngo yoohd bang gihn gihn me goohg yihr Juog tooro. Nyoge muu urom boadh ge unud.”

### Akoohg Gihn Yoad Ngaa Awii Giihe Piny

<sup>28</sup> Kaano e Piihter ake thubo ke rob kobe, “Maany wan! Giih wan ge awii wane piny cang kedea udoohng wane ne jo waahdhi.”

<sup>29</sup> E ngo abeehr Jeacuu beehro kobe, “A rob athiir yihru. Yaa wii miehy gen piny, wale wuud meeh gen wale nyemeeh gen wale meeh gen wale weeh gen wale nyethen gen wale puohdh giih gen ke nyinga kedea ke nying puohny Ciig Beer, <sup>30</sup> e giih nu wudh gen ubeehn Juoge ne coalo cang. Wudh gen ucoal Juoge yihr gen awaahn ni kedea cahng moogo keehd mooge me kaal wudh muu nu tiel jiehabiihj uyoad gene miehr kedea wuud meehe kedea nyemiihe kedea miiho maa nyethen kedea puohdh maa guum giih ajohr. <sup>31</sup> Yaa daahd ngo awaahn ni beere ge cuohn nyoge cuohno ne yaa me doonge ge naa yaa cuohn Juoge ne nyethen, abea yaa beehda nyethen awaahn ni ge naa yaa ucuohn Juoge ne nyoge me doonge cahng moogo.”

### Dahg Rob Jeacuu Ke Nying Thone

(Mat 20:17-19; Luk 18:31-34)

<sup>32</sup> Jeacuu kedea jo waahdh giihe ge anaa yi yooh, e ge caa Jeruucalem. Ge anaa acaahdh gene caahdho, e Jeacuu anaa nyum gen wong maalo. Gihn nu e jo waahdhe ge acwaahng kedea yaa anaa abuodh batiene gen ge atud ke nying

gihn uyoaad ngo kun nu. Kaano e Jeacuu yaae ge apaar wonge ariow ge acuohne kar ge keed gen uthube ke rob gihn utiihy ree yihyr gen kobe, <sup>33</sup>“Wo aman ci Jeruucalem! Abea ge uwahdho e a ge adoohng ne dhaano utaaahngo a uluom ucub gene an yi cing jo doohng yaa lam kedea yaa loohng Juog kedea a ukihm gene ke thoo kedea a ucub yi cing aleye. <sup>34</sup>Kuohma uyaahl gene kedea unguud gene riha. A upuohd gene ke ngeero kedea unahg gene an. Abea yi dahg nihn e a ucahr.”

### Gihn Daahd Waahd Jebeade

(Mat 20:20-28)

<sup>35</sup> Maa abeehn waahd Jebeade Jeamij kedea Joon umuong gene gihn daahd gene yi yihdh Jeacuu kob gene, “Ngad puohny wa daahd ucubi gihn kway wane bangi yihyr wan.”

<sup>36</sup> Maa apeechny Jeacuue gen kea, “Gihn ge daahdu banga ge roma cubo yihru ni.”

<sup>37</sup> Maa abeehr gene ngo yihre kob gene, “Wa daahd ngo umeehgi wan piih wudh koom ruohdh ucingi. Ngaa man ukwiihyi kedea ngaa man ucaami yi ruohdhi.” <sup>38</sup> Abea ngo abeehn Jeacuue ne beehro yihyr gen kobe, “Gihn peechny lum yea kwiihyu. Giih raahm kuohm ge uyug riha, ge neehn giih maa awuoj yea kubaayo ne maadho, ge romu kaa maadho wa ka umaadha gen ne? Wale giih guuma, ge uyoaad an ge romu kaa guumo?”

<sup>39</sup> Maa abeehr gene ngo kob gene, “Ayiih! Ge uguum wane.” Maa arub Jeacuue yihyr gen kea, “Giih raahm kuohm ge uyoaadu kedea giih guum ge uguumu. <sup>40</sup> Abea piih ukwiihya kedea ucaama padh an ne cub kuohn nu. Ge beehda kuohn yaa acub wura gen yihyr gen, wa kaa agweehge umodho.”

### Ruohdh Me E Ne Tiihyo Yihyr Nyoge

<sup>41</sup> Naa alihng goan joe giih apaar wonge ariowe lum nu, e cwiihny gen ake rahnyo rog waahd Jebeade Jeamij maa Joon umen. <sup>42</sup> Gihn nu e joe ke kar gen cang ge acuohn Jeacuue bange maa arube yihyr gen kea, “Ngahyu ne! Yaa daahd unahg gene ruohdhe wiih piny, nyoge kaahn gene kaa dhe yoohn laang ne nyoadh ngo kejea ge beehda ruohdhe me lum gen teeg. <sup>43</sup> Abea dhe yoohn ruohdh maru ne keede, bang gihn ngaa daahd udoohnge ne ruohdh e ngo e naa ngaa tiihyo yihyr nyoge. <sup>44</sup> Kedea ngaa daahd udoohnge ne ngad wong maalo nyumu e ngo dhiil doohng ne baahng me tiihyo yihyr nyoge cang. <sup>45</sup> Bang gihn a ke nguda, ge adoohng ne dhaano utaaahngo ge abeehn wiih piny, a kuu abeehno beere nyoge ge utiihyo yihra, a abeehno ne tiihj yihyr nyoge kedea ne cub riha ne naah ke nying awuohye giih nyoge ne dug.”

### Bartimoaj Ge Wonge Acoor

(Mat 20:29-34; Luk 18:35-43)

<sup>46</sup> Kaano e Jeacuu maa jo waahdh giihe ge abeehn geen Jeriiko. Kaano a'aay Jeacuue keehd jo waahdh giihe kedea amahr yaa buodh batiene yi geen nu, e dhaano me cuohn ne Bartimoaj ge beehda waahd Timiowj ni, ngo anaa apiih thaahng yooh. Bartimoaj ngo anahg ngaa maa acoor kedea kaano e naa ka piihe yea ne kwaj. <sup>47</sup> Naa alihng bang Jeacuu Ngad Naajaread kejea ngo abeehno, e ake thubo ke kwaago e uyuog e cuohn nying Jeacuu kobe, “Waahd Deabid! Jeacuu! Wongi akwaya, duu cwiihnyi caahn banga!”

<sup>48</sup> E ngo ake cuowo kejea lenge. Abea e naa kaa abare maalo ke kwaago e cuohn nying Jeacuu kea, “Waahd Deabid! Cedhree! Duu cwiihnyi caahn banga!”

<sup>49</sup> E Jeacuu ake cuungo kedea urobe ngo kejea, cuohne ubeehne bange.

Maa acuohn gene ucuor gihn ni maa arub gene yihre kob gene, “Aj maalo deed cwiihnyi! Yih ne ca cuohne nu.” <sup>50</sup> Maa akahle athoohr gihre oogo ngahye upaahre ke maalo ne ci bang Jeacuu.

<sup>51</sup> Maa apeechny Jeacuue ngo kea, “Gihn e ne daahdi ge roma yugo yihri?”

Maa abeehr ucuore ngo kobe, “Ngad puohny! Yab wonga.”

<sup>52</sup> Maa akob Jeacuue ngo yihre kea, “Kea noono aayi naa ayiihi ngo kejea yihra ne tee me yaba wongi. Yiiho gihri yih athiehdhe.” Nye kaano e wonge ree ayabe yabo uneehn pinye yihre kedea uguoe doohng ne ngad Jeacuu.

### Ngad Boadh Nyoge Awahnh Jeruucalem

(Mat 21:1-11; Luk 19:28-40; Jon 12:12-19)

**11** <sup>1</sup> Batiene nihn e Jeacuu kedea jo waahdhe ge a'aay ne ci Jeruucalem. Ne ci Jeruucalem e yedha nye good me nyinge Good Uliibe kedea ucor yihdh geedhe ariow Bedhpeag maa Bathany. Naa awahnh gene yihdh geedh nu e Jeacuu jo waahdhe kar ge ariow ge acuohne, <sup>2</sup> maa akoohbe yihyr gen kea, “Cidhu paan cuud nyumu abea ge wahdhu, e akaja me dhaano kuu akuong paahr wiihe uyoaadu e ngo amag piny. Goonyu ngo ukahlu ngo yihra kan. <sup>3</sup> Nea wu ke peechny kejea wu tiihy gihn kaa akaja, kea robu ngo kejea, ‘Ruohdh e ne daahd ngo kedea ngo uguoe ke duuo yihru piow piow.’”

<sup>4</sup> Kaano e ge acidho maa ayoad gene akaja, e ngo amag piny nyum dhe wod thaahng yooh. Maa agoony gene ngo.

<sup>5</sup> E nyoge maa anaa ake cuungo kaano, ge ke peechny kob gene, “Akaja goonyu kaa nying gihn?” <sup>6</sup> Maa abeehr gene ngo wa kaa arob Jeacuue ngo yihyr gen maa awii akaja ne goonyo yihyr gen. <sup>7</sup> Maa akedh gene akaja bang Jeacuu kedea upeedh gene waare giih gen ngahy akaja ne kar piih maa abeehn Jeacuue upaahre maalo wiih akaja. <sup>8</sup> Gihn nu e nyoge me thoohdh waay gen apeedh gene piny ke bang yi yooh kedea mooge ge jag boog tuuo ke bang yihdh puohdh ne peedh yi yooh ne lor Jeacuu. <sup>9</sup> Nyoge cang yaa ne wong maalo maa yaa buodh batiene ge ake caahdho e ge uwahr kob gene,

“Wuoru Juog.

Dooj Juoge ngade

ge abeehno ke yoohn Paar Maalo.

<sup>10</sup> Dooj Juoge ruohdh kuowo Deabid  
ge beehn ni.

Wuoro yaa ne Paar Maalo.”

<sup>11</sup> Kaano e Jeacuu awahn geen Jeruucalem kedea ucea kii laaro gihr Wod Juog. Noono uwene bang yi laaro cang. Abea naa adoohng pinye cahng ke yuudho e en maa joe ge apaar wong ariow ge adog geen Bathany.

### Yaadh Dhuuro Me Kuu Anyuol Alam Jeacuae

(Mat 21:18, 19)

<sup>12</sup> Ruuwow batien kaa a'aay gene Bathany maano e ge caa Jeruucalem, e Jeacuu ree ayoade e abang kahje. <sup>13</sup> Naa aniide yaadh dhuuro maa alodh me baahr ke dhe yooh e ngo ake cidho beere upuno ke nyethen dhuuro me poohd kuu acieg bang gihn ngo kuu anahg dwaahn ciege dhuure yea. Abea naa awahnhe tien dhuuro e nyethiin maa anaa wihe atooro. <sup>14</sup> Maa arube yihr yaadh ni kea, “Yih uthow ke wihi utoor ngaa muu ucahg nyetheni ke camo keehdo.” Gihn arob Jeacuae ngo anaa alihng jo waahdhe.

### Yaa Ngiew Ge Ariem Jeacuae Oogo Yi Laaro Gihr Wod Juog

(Mat 21:12-17; Luk 19:45-48; Jon 2:13-22)

<sup>15</sup> Gihn nu e ge adog duuo geen Jeruucalem maa abeehn Jeacuae ne mono yi laaro gihr Wod Juog. Naa aniid Jeacuae nyoge me thoohd ge ngeehw oogo ke giih yug kweehr kedea mooge ge ngeew giih kweehr e cwihnye ake arahnyo ke nying gihn ayug laaro gihr Wod Juog ne cuug. Kaano e ngo athubo ke riem yaa nu oogo. Tharbeaje giih yaa waar ngiihny ge ajwange pinye kedea utuge kuohn yaa ngeehw oogo ke winy<sup>c</sup> me nahg ne giih kweehr. <sup>16</sup> Thiw nyoge amahne ke ried yi laaro kea, “Kea ngaa ngud ke kan e ngo kaahn giih me ngeew oogo.” <sup>17</sup> Maa athube ke puohny nyoge kea, “Ngo beehda gihn maa agweed yi kitaab Juog kejea,

‘Wod Juog beehda kar kwaj yihr nyoge cang.’

Abea e aman ayugu ne kar yaa kahw.”

<sup>18</sup> Gihn ayug Jeacuae ngo abeehn jo doong yaa lame kedea yaa loohng Juoge ne lihngo. Kaano e ge athubo ke cej dhe yooh me nahg gene ngo, bang gihn puohnye anhyaar nyoge keraahyo.

<sup>19</sup> Ke wong thiehno e ge adog aay oogo yi buur geen Jeruucalem ne ci kar niine.

### Jeacuu Dhuuro Alame Uryaawe

(Mat 21:20-22)

<sup>20</sup> Yi ruu pinye ke nyango maano e ge duu Jeruucalem e ge niid dhuuro gihn alam Jeacuae ngo atal cang uwahdhe yi bieye. <sup>21</sup> Piihter gihn arob Jeacuae naa alame dhuuro ngo aguo ke paro maa arube yihr Jeacuu kea, “Ngad puohny! Maahny! Dhuuro gihn awaahro ge alami ngo ne ca atal cang.”

<sup>22</sup> Maa abeehr Jeacuae ngo kejea, “Yih thiow kwaad gihn nu romi kaa tiihyo nea Juog agaahni. <sup>23</sup> Ateed athiir yihru, ngaa rubo yihr good kea, ‘Good! Daag rihi oogo upahdhi yi naam duohng,’ ke cwihnye cang kedea ngo ayiie kejea ngo uyug Juoge yihre e ngo dhiil pahdh kare. <sup>24</sup> Nea neehn maano e ngo aroba yihru kejea kwaad gihn daahdu bang Juog ke dhe yoohn kwaj, ngahyu ngo kejea ucub Juoge yihru kedea udoohng ne gihru. <sup>25</sup> Abea nea yih ukwahyo e kea kuong giih reje ge amaani yi cwihny ke nying ngaa maa atiihy gihn me raaj rihi ke wii piny. Ge kuongi kaa awii piny beere Juog Wuru ge ne Maalo ni giih reje ge ayugi ree ge wiie ke piny yihri thiow. [<sup>26</sup> Nea lubo me raaj maa ayug dhaane rihi be wii ke piny e Juog wuru gihn raaj ge atiihy ree be wiie piny yihri thiow.]<sup>d</sup>”

### Lubo Ke Nying Ruohdh Jeacuu

(Mat 21:23-27; Luk 20:1-8)

<sup>27</sup> Naa awahn gene Jeruucalem e Jeacuu acaa yi Wod Juog, kaano acaahdhe caahdho e ruohdh yaa lam kedea yaa loohng Juog maa jo doonge, ge abeehn bange <sup>28</sup> maa apeehty gene ngo kob gene, “Teeg mari noono ngaa e naa acube yihri? Teeg gihn riemi yaa angeehw oogo yi laaro gihr Wod Juog?”

<sup>29</sup> Maa abeehr Jeacuae ngo yihr gen kea, “Adaahd upeehnya wun ke nyepiny acielo. Nea ngo abeehru, e kaa ayoada tee gihn ariema nyoge oogo keehde ngo roba robo yihru arumo. <sup>30</sup> Teeg mar Joon, ngad Luogwahy ngo ayoade ke Paar Maalo wale ke bang dhaano utaahngo? Beehru ngo yihra!”

<sup>31</sup> Kaano e ge ake thubo ke rob ke rog gen kob gene, “Awaahn ni, nea wo urubo yihre kejea, ‘Tee ayoade ke bang Juog,’ e ngo duoge duogo kobe, ‘Abea gihn e bahnge lum Joon kuu anaa ayiihu?’ <sup>32</sup> Abea ne wo urubo kejea, ‘Tee ayoade ke bang dhaano utaahngo,’ e nyoge ge taahny rogo bang gihn beehde ngahy gene cang kejea Joon anahg agamloohngjuog me duohng.”

<sup>33</sup> Kaa aniid gene ngo e kar beehr ngo ariehnyo yihr gen e arob gene robo kob gene, “Ngo kwihj wane.”

Maa aduog Jeacuae wiil lum gen kea, “A thiow, ngaa acub tee yihra ngo be roba yihru.”

<sup>c</sup>11:15 Yaa Judea winy me neehn amaam ge ne tiijh ne giih kweehr nyoge keehd gen, abea jieno be yug ne gihr kweehr. Thiow dhahg maa diehg kedea mow ge ke yugo ne giih kweehr.

<sup>d</sup>11:26 Yihd kitaab Juog maa agweed nyoge mooge 11:26 ngo tooro yihd gen.

## Ucaale Ke Nying Yaa Tiihj Giih Me Reje

(Mat 21:33-46; Luk 20:9-19)

**12**<sup>1</sup> Batiene e Jeacuu ake thubo ke rob yih yaa daahd ngo ke naah ke ucaale kea, “Anaa anudo ke nyin moogo maa anaa apiidh yen yi puohdho gihre. Gihn nu e puohdho aciele piny ke roog kedea uyuge ka me cong giih acieg yi puohdho. Thiw peehm ne koar puohdho kaa ayaahde ngo akoanye piny. Naa ayuge giih nu cang e nyoge akwanye me tiihyo yi puohdho. Maa arobe ngo yih gen kejea koog gen unahg giih puohdho ge ucieg. Noono uaaye ucea ne weel. <sup>2</sup> Ge anaa arome kar cig nyepinye ni, e baahng gihre aohre ke bang yaa tiihj ne ci ne kahl kur mare yihdh giih acieg. <sup>3</sup> Maa abeehn yaa tiihyo upuohd gene baahng kedea uriem gene ngo udooge ke cinge now. <sup>4</sup> Maa acahge baahng moogo ke oohro bang yaa tiihj keehdo. Maa agooje ke loadh yi wiie kedea ubang gene ngo keraahyo. <sup>5</sup> Naa aohre baahng moogo e ngo aci gene ke ne naah. Ce adoge baahng mooge me thoohd ke oohro upuohd gen kedea unahg mooge.

<sup>6</sup> “Nyin ni yihre anaa nye waahde acielo cog me nhyaare. Gihn nu e ngo aohre oohro bang yaa tiihj giih ni. Ngo aohre bang gihn ngo agweehge ke cwihnye kea, ‘Bang gihn nahge waahda e ngo uwuor gene.’

<sup>7</sup> “Abea ge aniid yaa tiihje waahd nyin e ge ake rubo ke rog gen kob gene, ‘E naa ngaa udoohng ne lag piny ni e gihn beehn ni. Nahgo ngo beere puohdho gihn udoohngo ne gihro.’ <sup>8</sup> Ge awahnh nyedhoohge e ge ataahny ree unahg gene ngo kedea uthoohr gene kuohme oogo ke wiih roog.

<sup>9</sup> “Naa aparu wudhu, gihn e nuu uyug ngad puohdhe yih yaa tiihj giih ni ge apiih ne cam ngo? Ngahda ngo ubeehn ne rwaahny nying gen ucube nyoge mooge ne tiihy yi puohdho? <sup>10</sup> Nye yaage! Gihn anaa agweed ke nying Ngad Boadh nyoge kuu angeyu yi ucaale gihn! Gihn anaa agweed naa,

‘Kaaw gihn akweer yaa geere keehde  
e naa adoohng ne meehn wod.

<sup>11</sup> Gihn nu beehda tiihy Juog,  
e Juog Aciehg tiihy gihn me gaahy nyoge.’ ”

<sup>12</sup> Lum arob Jeacuu cwihny jo doong lam araanye bang gihn ngo angahy gene kejea ucaale arobe ke rog gen ge yaa yug giih waal rih Juog. Cwihny gen anaa bang mag ngo abea ge atud ke nying thoohd nyoge, caahn e ge a'aay.

## Rob Ke Nying Gwaay Cuol Yih Jaah Roama

(Mat 22:15-22; Luk 20:20-26)

<sup>13</sup> Batiene e yaa Paarijea me maan Jeacuu kedea yaa batien Eroade ge aohr bang Jeacuu ne cej dhe beere gihn me maan yaa Judea ngo robe robo. <sup>14</sup> Maa abeehn gene bang Jeacuu urub gene kejea, “Ngad puohny ngahy wane kejea yih naa ngaa rob athere kedea yih be tud yih kwaad dhaano utaahngo. Kedea be ngaa me bad yihn keehd me duohng wa gihn, bang gihn yih be rubo ke nying dhaano moogo abea beehda lum Juog e ne puohny yih nyoge. Awaahn ni, wa daahd urobi lubo unghaye cang, ke nying cuol gihn cub yih Jaah Roama, <sup>15</sup> beehda gihn maa arob loohng Juoge yihro kejea gwaaj cuol yih Jaah Roama ne wale ngo amahne?”

Abea gihn raaj agweehg gene kii cwihny gen ngo angeye maa arube yih gen kobe, “Ngahya kejea wu tum an. Abea kea kahlu wong grihj yihra umaanya ngo.” <sup>16</sup> Maa akahl gene wong grihj acielo yihre. Naa amaanye ngo e akobe yih gen kejea, “Cuuro gih ngaa kedea nying ngaa e naa agweed ngahy grihj gihn?”

Maa abeehr gene ngo kob gene, “Beehda cuuro kedea nying Jaah Roama.”

<sup>17</sup> Maa akoohb Jeacuu yih gen kea, “Beer, cubu kwaad gihn beehda gih Jaah Roama yih Jaah Roama kedea cubu gihn beehda gih Juog yih Juog.”

Gihn nu e wudh gen anaa cohnd yi lum ateede bang gihn lubo abeehre ke dhe yooh me ka me mage tooro.

## Rob Ke Nying Gihn Meehg Juoge Nyoge Cahro

(Mat 22:23-33; Luk 20:27-40)

<sup>18</sup> Batiene e yaaj me cuohn ne Caaducean,<sup>e</sup> e be yih ngo kejea nyoge maa athow ge ucahro cahng moogo ge abeehn bang Jeacuu maa apeehty gene ngo kejea, <sup>19</sup> “Ngad puohny! Anaa arob loohng Moaje kejea, ‘Nea dhaano umen athow uwiie ciie piny abea nyethiin tooro yih gen, e ngaan nu umen athow, ciie umen geere geero beere yea ngo nyuole nyuolo.’ <sup>20</sup> Anudo ke wuud meehe abiihberiw. Ngaa duohng gen anaa abeehn ne nyuohm maa athowe e yihre tooro nyethiin. <sup>21</sup> Maa abeehn ngad batiene ugeere ciie umen kedea ucahge thoo e nyethiin tooro kiin gen. Maa acahg umiie gene moogo do wod ke dhaago maa athowe thiw e nyethiin tooro. <sup>22</sup> Kar ge noono abiihberiw ge abeehdo ke dhaar ni kedea uthow gene cang e ngaa maa anyuol keehd ngo tooro. Maa abeehn dhaage ne thoo ke batien gen thiw. <sup>23</sup> Me neehn kaa rubi kejea nyoge ge ucahro, e dhaar ni unahg ciie ngaa kiin gen? Bang gihn ge ke kar gen noono abiihberiw ge abeehdo keehde!”

<sup>24</sup> Maa arub Jeacuu yih gen kea, “Ngahda e naa gihn koba kaa wu nyoge me gihn me ngahy tooro ne? Gihn me ngahy tooro ke nying cah nyoge ge agweed yi kitaab Juog kedea ke nying teeg Juog e meehg nyoge cahro. <sup>25</sup> Ngaa muu unahg cuor dhaar nu utooro, bang gihn ge umeehg Juoge nyoge cahro e gihn me nyinge nyuohm utooro, nyoge ge uke beehdo wa kwaad mar wuohdjuog ge be nyoohmo. <sup>26</sup> Abea nea ke nying cahro ge ucah nyoge cahro wiha para paro kejea kitaab gihn agweed Moaje ngo akwaano, ge rubo ke kar bungo maa awaang. Agweede kejea Juog arubo kea, ‘A naa Juog awuor Abraahme maa Yijaag kedea Jeakob.’ <sup>27</sup> Yaa athow e ge wuor Juog, yaa nu ge kuow Paar Juog bang gihn beehda Juog e ne cub kuow. Yea lubo abaaju ne cohg.”

<sup>e</sup>12:18 Caaducean: ge beehda Judea me lum gen be roohm ke luub yaa Paarijea.

### Rob Ke Nying Loohng Wiihe Ne Maalo

(Mat 22:34-40; Luk 10:25-28)

<sup>28</sup> Ngad loohng Juog anaa anudo maano e Jeacuu maa yaa Caaducean ge upeehmo ke rog gen ke nying lum Juog. Naa aniide ngo kejea Jeacuu wonge teeg ne beehr luube e ngo apeehe kea, “Ngad puohny, loohng aweehne e naa loohng wiihe ne maalo kiin loohng Juog?”

<sup>29</sup> Maa abeehr Jeacuu ngo kea, “Gihn e naa loohng me wiihe ne maalo kiin loohng Juog cang. Lihngu gihn wu yaa Yijarael! ‘Juog e Ruohdho beehda acielo cog <sup>30</sup> kedea dhiil Juog Ruohdhi ke nhyaro ke aduuni beehde, ke wahyi beehde kedea ke wiihi beehd maa ke teegi beehde.’ <sup>31</sup> Riown gen e man: ‘Nhyar wadu wa ka nhyari rihi kii ngo.’ Loohng moogo me yoohm wudh loohng ni ariow ngo tooro.”

<sup>32</sup> Maa abeehr ngad loohng Juoge ngo yih Jeacuu kea, “Ngo angahyi ke beehro, ngad puohny! Gihn arobi ngo athiir kejea Juog beehda acielo kedea Juog moogo tooro kedea <sup>33</sup> dhiil kaa wuro ka aduulo beehde kedea ke wihj beehde maa ke teeg cang kedea thiow dhiil yaa beehd dhaane kiin gen ke nhyaro wa ka anhyar dhaane ree. Loohng ni ge ne wudh ge ne maalo nyum Juog yih ma beehn dhaane ucube giih kweehr yih Juog abea nhyahro tooro yi cwihnye.”

<sup>34</sup> Naa aniid Jeacuu ngo kejea ngo angahy rob e abeehre beehro yihre kea, “Ngo aniida kejea adoohng ka me cahng uyoadi Paar Juog.” Batien rob Jeacuu e ngaa maa adog ngo ke peehe ne tume tooro.

### Ngad Boadh Nyoge Beehda Kwaar Deabid Ke Ne Diih?

(Mat 22:41-46; Luk 20:41-44)

<sup>35</sup> Ge apuohny Jeacuu puohnyo yi laaro gih Wod Juog ni e akobe kea, “Gihn e koohb yaa loohnge kejea, ‘Ngad Boadh nyoge unahg kwaar Deabid?’

<sup>36</sup> “Adiehr muon Ngad Boadh nyoge beehda dhaano utaahngo bang gihn beehda ngad dhe wod paar Deabid. Abea adaahd uoaru wudhu yi lum anaa agweed Deabide yi kitaab Wahy Poong Juog. Agweede wa kaa arob Wahy Juoge ngo yihre kea,

‘Juog urubo yih Ruohdha kea:

“Piih ukwiihya kan,

uwahdhe ka uyuga yaa mahni ne gihr thaahdh tieni.’”

<sup>37</sup> Deabid kwaar cahge cuohn ne ruohdhe ke ne diih?”

E yaa athoohdho ge anaa ake lihngo cwihny gen amihno yi gihn arobe.

<sup>38</sup> Yi puohnye naa apuohnye puohnyo, e ngo arobe kea, “Cubu wudhu piny beer mee ubahnge giih yug yaa loohng Juoge ge be yugu. Yaa loohng Juog ge nhyar ngaab waare maa awuob kedea yi yooh ge nhyar ngo umaahdh gen ke cing ariow. <sup>39</sup> Ge koag ke mieg kuohn piih giih beeye wong maalo yihdh wuud amaad kedea ukoag gene thiow ke mieg kuohn piih giih beeye yi kuohn amahd nyoge yihdh gen. <sup>40</sup> Ge nyoge me nhyar cam giih gule kedea kwaj duug yi Wod Juog ne kang nying nyoge abea toohd now kway gen yea apuogo. Juog ge ukhme ke deeh ukhm me teeg.”

### Muuny Gulo Maa Angoohng Apuoj Jeacuu

(Luk 21:1-4)

<sup>41</sup> Cahng man Jeacuu anaa apiih buud caanduug ngiihny yi laaro gih Wod Juog, e many nyoge me cub piny ke ngiihny ke nying Wod Juog. Nyoge maa alony me thoohdh ge acub piny kaa amahr ngiihny. <sup>42</sup> Kaano e dhaago maa gulo ake beehno uthoohre wong grihj yi caanduug.

<sup>43</sup> Maa acuohn Jeacuu jo waahdh giihe urube yih gen kea, “Maanyu dhaar ca acub ngiihny yi caanduug. Nea gihn maa athiir e ne rob, e dhaar nu e naa amuuyo ke raahyo kiin yaa acub ngiihny piny cang. <sup>44</sup> Bang gihn yaa nu cang ge amuuyo, keehd maa amuuy gene, e ge ajal wudh ngiihny giih ne yih gen. Abea dhaar ni beehda dhaago maa angooohng kedea ucube gihre me koare wiihe ke ngo. Gihn acub dhaar nu ngo anhyar Juoge keraahyo ukaale wudh muu acub yaa alonye.”

### Thuohm Geen Jeruucalem Piny

(Mat 24:1, 2; Luk 21:5, 6)

**13** <sup>1</sup> Ge athub ge Jeacuu ke beehn oogo yi laar gih Wod Juog ni e dhaano acielo kiin jo waahdh giihe apiih ne leej Wod Juog yih Jeacuu kobe, “Ngad Puohny! Wod Juog gihn ageer ke leele maa awuob ne cohg. Maanyu kaa ayug wuude ne wuob kii ngo!”

<sup>2</sup> Maa abeehr Jeacuu ngo yihre kejea, “Gihn e ne ngahyi! Wuud nu awuob ge niidu ge uthoohm piny utoor wong leelo acielo muu udoohng wiih wad gen.”

<sup>3</sup> Gihn nu maa a'aay gene ne ci wiih good Ulihbe. Naa awahn gene e Jeacuu apiih maano e nyume aloge bang Wod Juog. Kaano e Piihter maa Jeamij kedea Joon maa Andrya, ge athubo ke peehe Jeacuu kar gen keed gen kob gene, <sup>4</sup> “Ngad puohny teed ngo yih wan, unahg cahng aweehne e nuu uthoohm Wod Juog piny kedea gihn e nuu unyoadh ngo kejea cahng utiih giih ni rog gen ngo abeehno.”

### Ka Thub Giih Me Reje Kii Ngo

<sup>5</sup> Noono e Jeacuu ake thubo ke rob yih gen kea, “Cubu cwihny piny beer mee ubahnge rogu be meehgu dwaahngo, <sup>6</sup> bang gihn amahr nyoge me dwaahng wun ke nying giih uyug rog gen ge ubeehn ke batiene e ge rubo kaa nyinga, e ngaa man ukooohbo kea, ‘A naa Jeacuu Ngad Boadh nyoge.’ Yaa nu, thoohdh nyoge urom gene ke dwaahngo. <sup>7</sup> Thiow linye bang gen ulihngu kedea dhog uwahn bangu ke nying linye mooge me ne kuohn me bahye. Abea yihdhu kea

baadh, bang gihn giih nu rog gen kuong gene kaa tiihyo umodho e cahng gug piny poohd kuu awahnho. <sup>8</sup> Paajo yea upahw ne dahg ubeehn yaa tien paajo acielo ukag gene ke rog gen kedea dhaahre giih wiih piny ge ukag ke rog gen. Amahr ayahng ngoom me thoohdh rog gen uyug gene ke bang kuohn me thoohdh wiih piny kedea kahj nyoge ubange ke bang wiih piny. Giih nu ge unahg ka uthub giih reje ge ukuong tuohl abea keehd maano e ge uroomo kaa raahm nyoohdo e thub maahdh batiene e bar maalo ke raahm keraahyo.

<sup>9-10</sup> "Abea Ciig Beer ngo dhiil kaa puohnyo yihr yaa ungoom maano e piny poohd kuu agug. Yugu rogu beere cwihnyu unгахmo ne koar giih reje ge upahdh wudhu. Wu umag ucub wun yi cing ruohdhe giih wuud amaade ke nying gihn nahgu jo'a. Wu upuohd gene yihdh wuud amaade kedea wu ukedh nyum ruohdhe kedea jaah ke nying gihn ayiihu luma. E naa ka uteedu giih alihngu banga yihr gen kedea yihr nyoge me padh yaa Judea. <sup>11</sup> Abea nea wu amag kedea ukedh wun yi lug e wu keá diero ke gihn urobu nyum lug, bang gihn rob urobu unahg Wahy Juog e nuu ucub ngo yihru ne robo.

<sup>12</sup> "Dhaano maa akweer ke luma, umen kedea nyethiine maa ayiih luma ge umaane uwahdhe ka uluome gen unahg gen. Thiw nyethiin maa akweer ke luma, wahn ke men maa ayiih luma ge umaane uwahdhe ka uluome gen unahg gen. <sup>13</sup> Wu thiw, wu umaan nyoge cang ke nyinga. Abea ngaan umag cwihnye teeg uwahdhe guge e ngaan nu e nuu uyoad boadh wahy.

### Raahyo Gihn Uyoad Jeruucalem

(Mat 24:15-28; Luk 21:20-24)

<sup>14</sup> "Cahng uniidu giih reje ngo ubeehn, cahng ubeehn Ruohdh atiihb ukeehg ujwaahge Wod Juog gihr Jeruucalem udoohnge ne ka me nyoge Juog be wuor gene yea. (Kaano e nuu ubeehn ngaa kwaahno upare wiie beer mee) kedea ubeehn yaa beed piny Judea ugoohd gene ke ngweej ne ci ne pahno yihdh bung yihdh goode. <sup>15</sup> Ngaa ayuud gihn nu e ngo ne piny kane, e ngo keá do wod ne cej gihr nyepiny <sup>16</sup> kedea ngaa nii puohdhe e ngo keá do paajo ne kaab waahnye. <sup>17</sup> Gihn nu unahg gihn me raaj keter yihr maahn me yaje kedea maahn dhuohdho bang gihn ge buu urom ngweej ne cohg. <sup>18</sup> Abea kwayu Juog beere gihn nu ree be yuge e piny aboar <sup>19</sup> bang gihn raahm upahdh yihdh nihn nu unahg raahm me raaj me kuu akuong pahdh upiny ke cahng anaa acag Juoge wiih piny uwahnhe awaahn kedea me ree buu ucahge ke bero cahng moogo keehdo. <sup>20</sup> Nea Juog Ruohdh ngo be ne guoe ke gweehgo ne ngol yihdh nihn nu, e dhaano utaahngo me ne bodh ne tooro. Abea ke nying yaae ge akwanye, e nihn nu ge ayuge noog. <sup>21</sup> Teeda teedo yihru thiw kejea nea dhaano ubeehn urube yihru kea, 'Arob gihn yihru! Ngad Boadh nyoge abeehno ke ca!' Wale ukoohbe kea, 'Ngad Boadh nyoge ngo ne ca!' Giih nu ge keá yiuhu ne weey weey naa athere. <sup>22</sup> Bang gihn unud ke nyoge me thoohdh muu ubeehn ke batiene ne dwaahng wun. Ngaa man ukoohbo kea, 'A naa Ngad Boadh nyoge' kedea ngaa moogo ukoohbo kea, 'A naa agamloohngjuog!' Yaa nu giih me teeg me gaahy nyoge ge urom tiihyo yihr gen. E naa ka uraany gene wudh nyoge uwii gene luma piny, keehd yaa akwany Juoge ne yaae wudh gen uraany gene nea dhe yooh ayoad gene. <sup>23</sup> Giih ni ge aroba yihru beere nea cahng ubeehn giih nu uyug gene rog gen e wu uyuud e rogu agwiiru.

### Cahng Ubeehn Jeacuue

(Mat 24:29-31; Luk 21:25-28)

<sup>24</sup> "Yihdh nihn nu, ke batiene giih raahm,

'e wong cahng naa lihb

kedea dwaahy buu ugeed maa

<sup>25</sup> ciehr ge uthub ke pahdho ke yoohn maalo

kedea giih yea maalo rog gen uyahng gene.'

<sup>26</sup> "Batiene e a ge adoohng ne dhaano utaahngo a uniid e a ubeehn kii lwahd keehd tee mara e wiie amoar.

<sup>27</sup> Kaano e wuohdjuog ge uoohr ne cong jo'a naa akwany ke bang upiny cang keehd kuohn me baahye.

### Cahng Beehna

(Mat 24:32-35; Luk 21:29-33)

<sup>28</sup> "Beehna uroma ke rih dhuuro. Nea ngo uthubo ke lodho e ngahj kejea oohro adoohng cahng. <sup>29</sup> Beehna ngo udoohng cahng nea wong cahng urwaahnyo. Neehn maano thiw nea giih nu rog gen ayug gene e kea ngahy ngo kejea beehna adoohng cahng. <sup>30</sup> Adiehr e ne roba yihru. Wu yaa nud awaahn ni wu buu uthow cang e giih aroba yihru rog gen poohd kuu atiihy gene. Wu ubodh keehd me yug giih nu ateeda rog gen. <sup>31</sup> Maalo kedea upiny kan ge utooro abea luma ree utiinge kare.

### Ngaa Keá Gwaahg

(Mat 24:36-44)

<sup>32</sup> "Abea cahng uduua ngaa me ngahy ngo tooro. Ngo kwihj wuohdjuoge ge nii maalo wale an thiw cahng ngo wale caang ngo kwihya. Juog Wura e keede e nuu unghy cahng ngo. <sup>33</sup> Koaru rogu, wu keá neno bang gihn kwihy cahng ngo ubeehn weehne. <sup>34</sup> Ngo uneehn ngaa maa aci ne weel ka me baahr uwiie baahng giie piny e tiih apaahng yihr gen cang. Noono maa arobe ngo yihr ngad koar dhe wod kejea ngo keá neno, koare paajo.

<sup>35</sup> "Nea wa maano e wu keá neno bang gihn ngo kwihy weehne e nuu ubeehn ngad paaje, uduu ke thiehno!

Dewaahr! Kaa akaahg piny wale ke nyango? <sup>36</sup> Wu dhiil koar beere nea ngo guo beehno e wu be yuude e wu aneno.

<sup>37</sup> Gihn roba beehda gihn me roba ke yihru cang. 'Ngaa keá gwaahg!'

### Kaa Agweehg Nahg Jeacuu

(Mat 26:1-5; Luk 22:1, 2; Jon 11:45-53)

**14** <sup>1</sup>Anaa adoohng nihn ariow unahge cahng Yaan Amono.<sup>f</sup> Maa abeehn jo doong yaa lame maa yaa loohng Juog udaahd gene dhe yooh ke piny me mag gene Jeacuu unahge. <sup>2</sup>Abea ge atud ke mag Jeacuu cahng yaay bang gihn kob gene, “Kuro tudi! Bang gihn nea ngo mago mago awaahn ni e yaa abeehn yi yaay wo maahd gene maahdo ke liny.”

### Jeacuu Wiihe Aloar Ke Mow Bathany

(Mat 26:6-13; Jon 12:1-8)

<sup>3</sup>Jeacuu anaa yi geen Bathany e ngo beehda weehno paar Cimoan Udhoobo. Kaano acahme cahmo e dhaago ake beehno e kaahn udhoohmo me yea ne mow me ngwaahy me ngiene teeg. Ngo akahle kedea uwoje ngo wiih Jeacuu.

<sup>4</sup>Naa aniid yaaj mooge maa anudo e mow awuoj dhaar ni wiih Jeacuu, e ge ake rubo ke kiin gen kob gene, “Beehda gihn e yoad mow me ngiene teeg uraany nyaane ngo now? <sup>5</sup>Gihn keree! Mown nu ne rom ngeew oogo ukahle amahr ngiihny me thoohdh me ne cub yihr nyoge maa angoohng.” Maa acay gene dhaar ni ne cohg.

<sup>6</sup>Abea ngo abeehr Jeacuu yihr gen kobe, “Wiiu ngo! Gihn ge giedu dhaar ni? Beehda gihn me beer ne cohg e naa atiihye yihra. <sup>7</sup>Yaa angoohng ge nyoge me beehdo kaa wun ke nying nihn kedea gihn me beer yugu yugo yihr gen wa ka daahdu ke cwihnyu. Abea an, a buu ukwaay beehdo ke wun e naa gihn beere noono ubeehn dhaar ni umoare wiih e a poohd nud ke wun. <sup>8</sup>Dhaar ni atiihy gihn me beer naa amoone piny ne wiih kuohma ke mow ne gwiir kuohma ke nying cahng ukoany an. <sup>9</sup>Awaahn ni a rob athiir yihru kejea kwaad kuohn upuohny Ciig Beer yihdh gen ke bang upiny cang, e gihn ayug dhaar ni uke robo thiw ne par bang dhaar ni.”

### Juudo Jeacuu Aluome

(Mat 26:14-16; Luk 22:3-6)

<sup>10</sup>Dhaano acielo kiin joe ge apaar wonge ariow, me nyinge cuohn ne Juudo a'aay ucea bang jo doong yaa lam ne luom Jeacuu yihr gen. <sup>11</sup>E cwihny yaa ni ake mihno naa aliing gene kwaad rob nu. Gihn nu e ngo arob gene yihr Juudo kejea ngo umuoj gene ke ngiihny me thoohdh nea Jeacuu luome luomo. Kaano e Juudo athubo ke cej dhe yooh me kahle gen bang Jeacuu beere ngo mag gene mago.

### Jeacuu Maa Yaae Ge Gwiir Ka Yug Gene Yaay Yea

(Mat 26:17-25; Luk 22:7-14, 21-23; Jon 13:21-30)

<sup>12</sup>Cahng umodho yihdh nihn Yaan Amono e jo waahdh Jeacuu apeehny gene kob gene, “Ngad puohny! Kee e ne daahdi nuu ugwiir wane ne kar piih yihro ne yug cam cahng Yaan Amono yea?”

<sup>13</sup>Maa abeehn Jeacuu uohre nyoge ariow kiin jo waahdh giie kea, “Cidhu yi diehr geen Jeruucalem nea wu uroohmo ke dhe cuow me kaahn piih kea buodhu batiene. <sup>14</sup>Paan umone yea e kea robu ngo yihr ngad paajo kejea, ‘Arob ngad puohnye kejea nyoadhi wod upiie yea keehd yaae ne yug giie yaay?’ <sup>15</sup>Wod unyoadhe yihru maalo maa agwiir beer mee ke nyingo. Yi wod nu gwiiru caame giieho.”

<sup>16</sup>Maa abeehn jo waahdhe ucidh gene yi diehr geew kedea uyoad gene giie anaa ateed yihr gen wa kar gen. Naa athum gene ke gwiir caam yaay, e ge adog bang Jeacuu.

### Jeacuu Arubo Yihr Jo waahdhe Ke Nying Luom Gihn Uyug Juudo

<sup>17</sup>Ke wong thiehno arumo, e Jeacuu ake beehno keehd joe ge apaar wonge ariow yi wod agwiir. <sup>18</sup>Naa apiih gene ne cam wiih tharbeajo, e Jeacuu ake rubo yihr jo waahdh kea, “A rob gihn maa adiehr! Dhaano acielo kiinu daahd uluome an keehd maa acahma tiehd keehde.”

<sup>19</sup>Gihn nu cwihny jo waahdh araanye ne cohg. E ngaa man peehny Jeacuu kea, “Unahg an ne wale gihn?”

<sup>20</sup>Maa abeehre ngo yihr gen kea, “Unahg ngaa uroohm cing wane yi wal keehde kiinu noono apaar wonge ariow. <sup>21</sup>A ge adoohng ne dhaano utahngo a uthow wa kaa agweede yi kitaab Juog abea ngaa luom an, a ge adoohng ne dhaano utahngo unaa yi gihn me raaj ne waany adhaahr ngweehn me bahng ngo be ne nyuol.”

### Kuohm Jeacuu Ayug Ne Cam Yihro

(Mat 26:26-30; Luk 22:14-20; 1Kor 11:23-25)

<sup>22</sup>Kaano acahm gene cahmo, e Jeacuu amono akaabe batiene naa adooge ngo e ngo abanye maa acube ngo yihr jo waahdhe e urubo kea, “Kaabu ngo kedea camu ngo. Gihn ni beehda e naa kuohma.”

<sup>23</sup>Keehdo e kubaayo me yea ne koongo akaabe batiene naa amuhje koohr Juog e ngo acube yihr gen maa amaadh gene ngo.

<sup>24</sup>Maa arube kea, “Gihn ni beehda rema. Rem nweehd won ge awoj piny ke nying nyoge me thoohdh. <sup>25</sup>A teed athiir yihru. Koongo buu uchaga ke maadho keehdo uwahdhe cahng umaadha koohng nyaahn Paar Juog.”

<sup>26</sup>Batien kaa awahr gene Wahy Apoong Juog, e ge ake aay ne ci wiih Good Ulihbe.

<sup>27</sup>Maa arub Jeacuu yihr gen kea, “Wu noono cang wu ugoohd oogo riha uwiiu a piny wa kaa agweede yi kitaab Juog ke nyinga naa,

‘Ngad kwaah unahg ubeehn diehge ulog gene keedho.’

<sup>f</sup>14:1 Yaa Judea yihr gen ne yaay me yug gene ke nying wong ne par kaa akahl Juoge gen oogo piny Micirh. Yaay beehda nihn abiihjeriow kedea yihdh nihn nu e ge cam amono me bahdh. Ke nying gihn nu e ne cuohne ne Yaan Amono.

<sup>28</sup> Abea cahng ucahra ke batien thoo, e a ucidh Gaalili ka ubeehnu banga yea.”

<sup>29</sup> Maa abeehr Piihtere ngo yihre kobe, “Keehd me paahr nyoge oogo ugoohd gene, e a ke nguda a be kuong paahr oogo uwiia yihn piny.”

<sup>30</sup> Maa akob Jeacuu ngo yihre kea, “Adiehr e ne roba yihri. Tihn noon ni yi dewaahy tihn maano e uthuonjieno poohd kuu akoohg ne riow e yih ukweer ke an tiel adahg kejea a kwihyi.”

<sup>31</sup> E ngo acahg Piihtere kaa beehro kea, “A be kuong kweer ne weey weey kejea yih kwihya keehd me nahge thoo, e a uthoo tiehd ke yihn.” Maa abeehr gene ngo cang wa kaa arob Piihtere.

### Jeacuu Akwahyo Piny Gedhceama

(Mat 26:36-46; Luk 22:39-46)

<sup>32</sup> Batiene e ge abeehn piny me cuohn ne Gedhceama maa arobe ngo yih jo waahdh giie mooge kea, “Piihu kan ne koar, abea wu keá gwaahg. A nyiig wong maalo ne kwaj.” <sup>33</sup> Maa acuohne Piihter kedea Jeamij maa Joon ne cidho keehde. Nye kaano e Jeacuu ree ayoad yih rahny cwihny me duohng ke raahm aduulo me teeg. <sup>34</sup> Kaano e arubo yih yaa caahdh keehde kea, “Yaage! Aduuna urahmo cang ke raahm me wa a cej thoo. Doohngu kan abea wu keá neno.”

<sup>35</sup> Maa acidhe wong maalo, ka me thiin mee e apahdh wudh conge ne kwaj kejea nea kare nud kea beehnd deeh raahm gihn bare now ke buude. <sup>36</sup> Maa arube kea, “Abaa Wura! Giih nyepinye cang ge yoohd yihri. Nea kare nud kea kaab raahm gihn ni beehnd riha. Abea keehd maano, e keá yugi wa ka daahda abea yug ngo wa kar cwihnyi.”

<sup>37</sup> Ge aduue bang jo waahdh giie ni, e ge ayuude e ge uneno. Maa acaye Piihter kea, “Cimoane yih keá neno! Yih ka be rom koar ke kar caa acielo cog ne? <sup>38</sup> Wu keá neno, abea kwahyu beere wu be tum atihb ukeehge. Mare ngo athiir! Aduulo ngo teeg, ngo rom guum abea kuohm e naa agoohg.”

<sup>39</sup> Maa acahge aay keehdo, ne kway Juog e ber gihn anaa arobe umodho yih wahn. <sup>40</sup> Naa acahge duuo e ayuud jo waahdh giie adahg e ge ane twar ke niine bang gihn ge anaa agoohg niine ne cohg. Noono ulaahy wudh gene utoor gihn maa arob gene.

<sup>41</sup> Maa aduue keehdo yi dahg gen, urube yih gen kea, “Wu poohd niin gihn? Gihn me nenu ke nyinge keehdo tooro bang gihn caang cub an, a ge adoohng ne dhaano utaahngo, yi cing nyoge me reje ne naah ngo abeehno. <sup>42</sup> Yedhu maalo upahdh yooh. Ngaa aluom an e aman awahnho.”

### Jeacuu Amag

(Mat 26:47-56; Luk 22:47-53; Jon 18:3-12)

<sup>43</sup> Piow piow kaano apoohde e Jeacuu urubo nu, e Juudo ge beehdo dhaano acielo keew yaa Jeacuu ge apaar wonge ariow ake wahnho e ngo caahdh kaa nyoge me thoohdh maa aohr jo doong yaa lame maa yaa loohng Juoge kedea jo doong paajo. Yaa ngo ge akaahn pale kedea belunge.

<sup>44</sup> Ngo anaa arob Juude yih jo abeehne ke gen kea, “Ngaa baahba ree ke maahdh e naa ngaa magu bang gihn e ne daahdu. Magu ngo uayy keehde kedea kaahnu ngo e atiegu piny.” <sup>45</sup> Kaa awahn Juude, e abaahb rih Jeacuu ke maahdh kobe, “Kooih Ruohdh.” <sup>46</sup> E jo anaa ake caahdh ge ake beehno umag gene Jeacuu utuohj gene ngo. <sup>47</sup> Gihn nu e ngaa maa ake cuungo kaano, pala ayuohdhe ke oogo ungole yih baahng me tiihyo paar ngad duohng yaa lam. Yihdh ngo angole piny ne thihb.

<sup>48-49</sup> Maa apeechny Jeacuu gen kea, “A abeehdo ke wun kedea a na niidu niidu e a caa yi laaro gihr Wod Juog ke nying nihn upuohnya nyoge puohnyo abea a kuu anaa amagu. Awaahn ni gihn ge beehnu banga e wu kaahn pale maa belunge kii cingu udoohng wa a beehda ngaa maa apaahr oogo ne liny ke ukuuma? Abea awaahn beehda giie anaa agweed yi kitaab Juog ge ne pahdh kar gen wa kaa agweed gen.” <sup>50</sup> Kaano e jo waahdh cang ge ake aay ke ngweej uwii gene Jeacuu piny yi cing nyoge me reje.

<sup>51</sup> Batiene e ngaa maa arih maa angaab waahny niine kedea caahdh kaa cinge now, apahdh ne buodh batien jo ni amag Jeacuu, e ngo akwahg gene ke piny umag gene ngo. <sup>52</sup> Kaano e nyin anaa apoj yi cing gen ugoohde ke kuohme now, uwiie waahnye yi cing gen.

### Jeacuu Ne Nyum Akuud Yaa Judea

(Mat 26:57-68; Luk 22:54, 55, 63-71; Jon 18:13, 14, 19-24)

<sup>53</sup> Kaano e Jeacuu abeehn gene ne kedh paar ngaa duohng jo doong yaa lam kaa amahd jo doong yaa lame kedea jo doong paaje maa yaa loohng yea. <sup>54</sup> Piihter anaa ake caahdh e buodh batien Jeacuu ke ka me baahr mee uwahdh paar ngaa duohng yaa lam. Gihn nu e ngo apiih buud acaakere giie koar Wod Juog maa anaa buud maaj ne oohyo.

<sup>55</sup> Abea e jo doong yaa lam kedea yaa Akuud Judea giie acuohn ge apiih ne daahd awuohj rih Jeacuu beere ngo ke kihmo. Abea kihde now awuohj maa ayoad gene rih Jeacuu tooro me rom ngo ke kihmo ke thoo. <sup>56</sup> Keehd maa abeehn nyoge me thoohdh upiie gene ne rob giie toohd rih Jeacuu, ne kal dhe, nyum akuud yaa Judea, e gihn maa ayaahng yaa lug yi luub gen tooro, bang gihn luub gen ge kuu aroohmo. <sup>57</sup> Kaano e nyoge mooge ge ayedh maalo ne rob toohd kob gene, <sup>58</sup> “Ngaan anaa alihng wane e urubo kea, ‘Wod Juog gihn ni ageer dhaane ngo uthuohma piny abea batien nihn adahg e moogo ugeera kare me padh dhaano e naa ageer ngo.’” <sup>59</sup> Abea keehd maano e luub gen poohd be roohm.

<sup>60</sup> Naa abahng awuohj maa ayoad rih Jeacuu tooro, e ngaa duohng yaa lam Jeacuu apeechny peechnyo kobe, “Gihn e bahng wudh giie rob rihi ge be duogi? Gihn e naa adiehr kiin giie arob yaa ni rihi?” <sup>61</sup> Abea Jeacuu aleng ne caaj ubahng rob nu keá beehro.

Ucahg Kaaypaje piehj keehdo kobe, “Beehr ngo yihra, yih naa Ngad Boadh nyoge ge Waahd Juog Aciehg?”

<sup>62</sup> Maa ayiih Jeacuue ngo kobe, “Beehda an kedea a ge adoohng ne dhaano utaaahngo a uniidu e a apiih ukoom ruohdh ukwiihy Juog wiith koom ruohdh kedea a uniidu ge ubeehna wa daahr maaj kii lwahd ke yoohn maalo Paar Maalo.”

<sup>63</sup> Maa abeehn ngad duohng yaa lame urahny cwihnye yi kwaad gihn arob Jeacuue rih Juog. Gihn nu e ngaa duohng yaa lam waahny ree ke ngude ayieye ke oogo yi ngahye maa aloge dheer ne rob yihr yaa akuud kobe, “Ngahda ngo alihngu kaa amage ree ke dheer kea e uroomo ke Juog? Naa awuohj moogo me cahgo ke daahdo yaage?” <sup>64</sup> Ngo alihngu cang kaa arube kea e uroomo ke Juog. Nea maru e ukihm gihre beehda gihn?” E yaa akuud Judea cang ge akoohbo kob gene, “Kihme ke thoo.” <sup>65</sup> Kaano e wong Jeacuu atuohj gene tuohyo kedea uthub gene ke nguud rih ngo kedea ke twang wiithe ne yaahr kuohme kedea e ngo ke peehnyo naa, “Yih nyin akoohbo kii yih Ngad Boadh nyoge caar ngaan nguud rihi kedea ngaan goj yihn!” Noono maa akaab acaakere ngo ne ci ne puohdo.

### Kaa Apeehm Piihtere Kea Jeacuu Kwihye

(Mat 26:69-75; Luk 22:56-62; Jon 18:15-18, 25-27)

<sup>66-67</sup> Kaano ge apoohe e Piihter ne kiin yaa ni piih buud maaj ne oohyo ni, e nyaakow me beehda baahng paar ngad duohng yaa lam ake beehno. Naa aniide Piihter e bang ngo amaanye keraahyo maa arube yihr ngo kea, “Yih na niida niido thiow kiin yaa ne caahdh keehd Jeacuu Ngad Naajaread?”

<sup>68</sup> E Piihter ake kweer kea, “Ngaan nu rubi ke nyinge ngo kwihya kedea gihn robi ni be ci wiitha ne cohg!” Maa aci Piihtere oogo yi kala kedea uguo uthonjijene ke koohg.

<sup>69</sup> E Nyaakow ni aween ni, Piihter acahge ke niido urube yihr yaa anaa ake cuungo oogo kar lug kobe, “Ngaan beehda ngad gen thiow.” <sup>70</sup> E Piihter poohd ukweer keree kea Jeacuu kwihye.

Batiene e yaa ake cuungo ge athubo ke rob yihr Piihter kob gene, “Ne cohg yi beehda ngad Jeacuu, bang gihn yih rubo wa ka rub yaa Gaalili kii ngo.”

<sup>71</sup> Abea ge alihng Piihtere rob nu, e athub ke kuohng ree kea, “Yaage! Arob adiehr nyum Juog. Ngadu noono rubu ke nyinge nu ngo kwihya!”

<sup>72</sup> Nye kaano athume ke rob e uthonjijeno acahg koohg keehdo, maa apar Piihtere gihn anaa arob Jeacuue yihre, “Tihn noon ni yi dewaahy tihn, maano e uthonjijeno kuu akoohg ne riow e yiith ukweer ke an tiel adahg kejea a kwihyi.” Maa athub Piihter ke lalo ke keej yej naa angeye deeh awuohj gihn atiihye.

### Jeacuu Akedh Nyum Pilaato Yi Lug

(Mat 27:1, 2, 11-14; Luk 23:1-5; Jon 18:28-38)

**15** <sup>1</sup> Yi ruu piny ke nyango coon, e jo doong yaa lam kedea jo doong paajo maa yaa loohng Juog kedea yaa akuud ge apiih ne mad gihn utiihy gene. Gihn nu e ngo amad gene kejea Jeacuu kedh bang Pilaato, Muudiihr Roama ge mag piny Judea beere ngo kihme kihmo yihr gen ke thoo. Kaano e cinge ge atuohj ukedhe bang Pilaato.

<sup>2</sup> Ge awahn Jeacuue bang Pilaato ni, e Pilaato Jeacuu apeehnye kobe, “Yih naa Ruohdh yaa Judea ne?”

Maa abeehr Jeacuue ngo kea, “Yih naa arob ngo ke dhii.”

<sup>3</sup> Kaano maa athub jo doong yaa lame ne rob gihn amag gene ngo ke nyinge e ge rob giith me reje me thoohdh rih Jeacuu. <sup>4</sup> Noono e Pilaato Jeacuu apeehnye kea, “Gihn me beehri tooro ke nying giith arob rihi? Maany amahr giith ni thoohdh ge arob gene rihi!”

<sup>5</sup> Abea gihn maa abeehr Jeacuue tooro maa acwaahng Pilaato yi kwaad man bahng Jeacuu ree be konye ke dheer.

<sup>6</sup> Ke nying wong yi Yaan Amono e Pilaato kwaad maabuuj me daahd paaje kejea ke lonyo, e ngo lonye ke oogo yi thijin. <sup>7</sup> Ngaa me cuohn ne Barabaj ngo anaa yi thijin keehd yaae naa apaahr oogo ne liny kaa akuum Roama. Nyoge ge anaa anahg gene yi gihn apaahr gene oogo ni. <sup>8</sup> Gihn nu e nyoge me thoohdh ge awaahd bang Pilaate ne peehny ngo ulonye dhaano yihr gen wa kwaad ka ne yuge ngo ke nying wong yi Yaan Amono.

<sup>9</sup> Maa apeehny Pilaate gen kea, “Wu daahd ngo ulonya Jeacuu ge ruohdhu?” <sup>10</sup> Bang gihn ngo abeehn Pilaate ne ngeyo kejea beehda ke nying giith tiel now e naa amag jo doong yaa lame Jeacuu ne kahl nyum lug. <sup>11</sup> Maa abeehn ruohdhe giith ni ucoam gene yihdh nyoge cang kejea nahge ke Barabaj e ne peehny gene yihr Muudiihr Pilaato beere lonyo oogo yihr gen abea padh Jeacuu.

<sup>12</sup> Batiene e Pilaato ake peehyo keehdo kea, “Abea nea wa maano, yuga gihn keehd Jeacuu ge cuohnu ne ruohdhu ne?”

<sup>13</sup> E nyoge cang ge ke athubo ke kwaago kob gene, “Gure rih yaadh.”

<sup>14</sup> Maa apeehny Pilaato kea, “Abea gihn noono raaj ge awuohye ni?”

E ge abar maalo ke kwaago kob gene, “Gure rih yaadh.” <sup>15</sup> Pilaato cwihnye atooro bang urahny cwihny nyoge ree, noono maa ayiihe ngo wa kar dhog gen ulonye Barabaj. Naa athum acaakere ke puohd Jeacuu wa kaa arob Pilaate, e ngo acube yihr acaakere beere ngo caa ne gur rih yaadh maa ariihw.

### Jeacuu Wiihe Ariiw Ke Koadhe

(Mat 27:27-31; Jon 19:2, 3)

<sup>16</sup> Kaano e acaakere, Jeacuu abeehn gene ne kedh yi wod paar muudiihr ge cuohn ne Preetoarya. Noono ucuohn gene acaakere giith anudo cang. <sup>17</sup> Maa angaab gene ngo ke jalaabya me kwaar kedea uyoad gene koadhe udol gene gen naa atahny ruohdh maa acub gene ngo wiihe <sup>18</sup> kedea uthub gene ke yaahle e ge ukoohbo kejea, “Maahdh ya Ruohdh yaa Judea.” <sup>19</sup> Utwang gene wiith ngo twango keehd theengo kedea ge nguud yi wonge maa urung gene cong gen ke piny nyum ngo wa ge wuur ruohdh. <sup>20</sup> Naa athum gene ke ngier kuohme e jalaabya akahl gene oogo ree kedea uduog gene waaye ree, batiene e ge a'aay keehde ne kedh ne gur rih yaadh maa ariihw.

### Yoohn Yaadh Maa Ariihw

(Mat 27:32-44; Luk 23:26-43; Jon 19:17-27)

<sup>21</sup> Cimoane ngad piny Ciriinha anaa ake kahnho ke kaano e beehn kaa yi yoohn puohdho. Ngo anahg wur ge Alekjander maa Rupuj. Gihn nu e acaakere Cimoane amag gene ne bien yaadh gihn ugur Jeacuu ngahye naa agoohg Jeacuu ke tihng yaadh. <sup>22</sup> Jeacuu abeehn ne kedh ka me nahg nyoge me reje yea me cuohn ne Golgotha<sup>9</sup> lum yea, "Paan Wiihj."

### Jeacuu Agur Rih Yaadh Maa Ariihw

<sup>23</sup> Batiene e ge athubo ke cub koongo maa alyaahb keehd yaadh me cuohn ne mer kejea maadhe ngo ne nahg raahm maa akweere ke maadh ngo. <sup>24</sup> Kaano e ge apiih ne gur Jeacuu ngahy yaadh maa ariihw kedea upaahng gene waare giihe ke rog gen ke dhe yoohn thalo.

<sup>25</sup> Jeacuu agur ngahy yaadh ke nyango ka ne lony diehg. <sup>26</sup> Maa agweed gene awuohj gihn apar gene kejea ngo ayug Jeacuu rih yaadh maalo naa, [sc"RUOHDH YAA JUDEA."]<sup>d</sup> <sup>27</sup> Maa uyoad gene yaa kahw ariow ugur gene gen ngahdh yen wa kwaad mar Jeacuu ngaa man nuu ukwiihye kedea ngaa man nuu ucaame. [<sup>28</sup> E naa kaa abeehn gihn agweed yi kitaab Juog ke nying Jeacuu upahdhe kare ge anaa agweede naa, "Anahg wa kwaad ka nahg ngaa me ree naa awuohj."]

### Kuohm Jeacuu Angier Nyoge

<sup>29</sup> Batiene e kwaad yaa ngul piny now e ngo cwiid gene cwiido e wudh gen gihny gene gihnyo kedea e ge uyahdo kob gene, "Yih nyin ne koohbo kejea Wod Juog thuoim ke piny kedea uromi ngo ke geero ucuunge batien nihn adahg, kea noono kony rih, <sup>30</sup> uyihnihi piny ke rih yaadh ariihw."

<sup>31</sup> Thioh Ruohdh yaa lam kedea yaa loohng Juog ge apiih ne yaahl ngo maa arub gene ke kiin gen kob gene, "Na ukoohbo kejea e ngad kony nyoge! Abea gihn e bahng ree be rome ke konyo? <sup>32</sup> Ngahda e naa ruohdh yaa Yijarael! Kea noono yihne piny ngahy yaadh nu agure ree beere lume yih wane yiho." Thioh keehd yaa anaa agur maalo buude ngo ayaahl gene tiehd.

### Thon Jeacuu

(Mat 27:45-56; Luk 23:44-49; Jon 19:28-30)

<sup>33</sup> Kaano maa abeehn deeh muudho umoale piny cang ne cihdh cihdhi. Naa athube e cahng nii diehr wihj uwahdhe kaa alaaahng e gihn me neehn tooro. <sup>34</sup> Yi laahng cahng e Jeacuu ake yuog e duone atihng maalo, "Eloo! Eloo lama cabajthaahni?" [Lum yea: Juog Ruohdh, Juog Ruohdh, gihn ge paahli an oogo wa gihn?]

<sup>35</sup> E yaa anaa ake cuungo duon Jeacuu alihng gene uthub gene ke rob kob gene, "Cegu yihdhu! Adoohng wa cuohn Eliija ge anahg agamloohngjuog naa acoon beere beehn ne kony ngo."

<sup>36</sup> E dhaano acielo kiin yaa ni ake goohdo ne kahl koongo me waj. Maa akaabe bur waaro ucode ngo yi koongo maa atuohje ngo wiih theengo urwaage ngo yi dhe Jeacuu ne maadh e ukoohbo kea, "Maanyo ngo! Ka moogo e Eliija ubeehn ne kahl ngo oogo ngahy yaadh."

<sup>37</sup> Gihn nu e Jeacuu acahng lalo kedea e naa thone noono.

<sup>38</sup> Kaano e waaro gihn anaa apaahng kur Dhe Wod ke kur Dhe Tiel yi Wod Juog yea ayiej ree piny ne dahg naa ariow ke maalo uwahdhe piny. <sup>39</sup> Ge aniid jaabidhe gihn anaa ake kuro kaa athow Jeacuu kii ngo ni, e ake rubo kea, "Beehda adiehr, nyin anahg Waahd Juog ne cohg."

<sup>40-41</sup> Maahn mooge thioh ge anaa anudo ka me cahng e ge maahnyo kaa ka me baahr. Maahn maa a'aay Gaalili keehd Jeacuu ne beehn Jeruucalem. Ge ne tiihy giih daahd Jeacuu kedea jo waahdhe. Maarya Madaleana kedea Caloame maa Maarya miih Jeamij, Jeamij gihn thiin kedea Joacej ge anaa anudo keew maahn nu.

### Jeacuu Kuohme Akan

(Mat 27:57-61; Luk 23:50-56; Jon 19:38-42)

<sup>42</sup> Anahg cahng gwiihdo bang gihn ruuwow beehda Cahng Cabadh e bahng nyoge be tiihyo yea. <sup>43</sup> Ngaa me nyinge Jocebe anudo, ngad geen Arihmathea kedea ngo anahg ngaa me duohng kiin yaa akuud gih yaa Judea. Jocebe anahg ngaa maa ayiih ngo ke coon kejea Jeacuu Juog e naa aohr ngo ne Ngad Boadh nyoge gihn koar kejea ngo ubeehn. Naa aniid Jocebe ngo kejea adoohng ka me thub cahng Cabadhe e cwihnye adeede maa acea paar Pilaato beere kuohm Jeacuu ke cub yihre ne koanyo e piny poohd kuu ayuudho. <sup>44</sup> Maa abeehn Pilaate ucwaahng ke kaa aguo Jeacuu thoo kii ngo maa acuohne jaabidh gihn anaa ne koar kedea upeehnye ngo nea ngo beehda adiehr, kejea Jeacuu aguo thoo. <sup>45</sup> Ge arob jaabidhe ngo yihre kejea ngo beehda athiir, e kuohm Jeacuu abeehne ne cubo yih Jocebe. <sup>46</sup> Maa abeehn Jocebe, ungeewe waaro, gihn me bahye kuohm Jeacuu keehde maa akahle kuohme oogo ngahy yaadh anaa agure yea. Ubahje kuohm ngo ke waaro kedea ucea ne kan ngo yi buur maa akoany coon ne liel batiene e deeh leelo aloohre dhe wod. <sup>47</sup> E maahn kar ge ariow kaa akan kuohm Jeacuu yi ngo abeehn gene ne niido. Maahn ni ge anahg Maarya miih Joacej kedea Maarya Madaleana.

<sup>9</sup>15:22 Golgotha: Beehda ka me thoohny mee, beehda piny leele abea padh wiih good. Deeh wod me duohng akony laahj mee ne kar kan nyoge maa thoo. Dhe wod gihn ni ciehg kaa deeh leelo me duohng. Kedea yi wod kuohn maa agwiir ne kar kan nyoge yihdh gen nud. Anahg kwaad kuohn nu e naa akan kuohm Jeacuu yea.

## Liel Yea Apuogo Kedea Rob Wuohnjuog

(Mat 28:1-8; Luk 24:1-12; Jon 20:1-10)

**16**<sup>1</sup>Naa ayuudh cahng ubar Cahng Cabadhe, e bahnge nyoge be tiihyo yea, e Caloame maa Maarya ge miih Jeamij maa Maarya Madaleana ge acidho ne ngeew mow me ngwaahy me ci gene ne wihr kuohm Jeacuu. <sup>2</sup>Ruuwow e ge amool oogo e piny kuu aruu ne ci wiih liel. <sup>3</sup>Noono caahdh gene e ge upeehyo ke rog gen ke ngaa uloor deeh leen acub dhe wod liel oogo yihr gen.

<sup>4</sup>Abea ge amaahny gene, e ge niid dhe liel ngo apuogo kedea leelo tooro dhe. <sup>5</sup>E amon gene yi liel, e ge niid wuohnjuog e ngo apiih kur kwihj. Ngo angaab waare me bahye me tar ne wee. Ge aniid maahne wuohnjuog e ge anahg lwahre kwaade tooro.

<sup>6</sup>Maa arub wuohnjuoge yihr gen kea, “Wu keá tud! Ngahya kejea wu daahd Jeacuu ge anaa agur ngahy yaadh maa ariihw. Jeacuu ngo tooro kan bang gihn ngo ameehg Juoge cahro. Maanyu kaa anaa apiehle yea. <sup>7</sup>Abea cidhu ne robe yihr jo waahdhe maa yihr Piihter kejea Jeacuu amoono nyum gen wong maalo ne ci Gaalili. Nea neehn maano e kea cidh gene kun ca ne roohm keehde neehn kaa anaa arobe ngo e poohd kuow.”

<sup>8</sup>Kaano e maahn arihng oogo kedea ugoohd gene oogo kar loohro bang gihn wudh gen ariih yi kwaad gihn ayug ree. Noono utud gene ke rob gihn ayug ree yihr kwaad dhaano now ke nying lwahr naa amag gen.<sup>h</sup>

### Jeacuu Ree Anyoadhe

(Mat 28:9, 10; Jon 20:11-18)

<sup>9</sup>Naa acahr Jeacuue yi thoo cahng anaa abeehn maahne uyoed gene loohro apuogo e cahng nu ree anaa abeehne ne nyoadho yihr Maarya Madaleana. Maarya gihn anaa arieme atiihbe abiihberiw oogo rih ngo coon e Jeacuu poohd kuu anahg. <sup>10</sup>Batiene e dhaar ni abeehn ne ci bang yaa anahg gom Jeacuu kedea jo waahdh giie ge acong wudh gen ka maa acielo ne yuog thone. <sup>11</sup>Abea ge alihng gene ngo kejea Jeacuu acahr kedea ngo aniid Maarya Madaleana, e ngo kuu ayiih gene.

<sup>12</sup>Batien kaano e Jeacuu ree acahge ke nyoadho yihr jo waahdhe ariow maano e ge caa yihdh miehr. <sup>13</sup>Ge a'aay Jeacuue e naa kaa angey gene ngo kejea ngaan ake rubo keehd gen anahg Jeacuu. Noono udoog gene kuu utien gen ne ci ne rob ngo yihr yaa gen kejea Jeacuu aniid gene. Abea lum gen kuu ayiih naa athiir.

<sup>14</sup>Batiene arumo e ree abeehne ne nyoadho yihr joe ge apaar wonge acielo, maano e ge piih ne cam. Maa ataahnye yi nying gen, bang gihn kuu ayiih gene naa arobe kejea ngo acahr ke batien thoo.

<sup>15</sup>Maa arube yihr gen kea, “Cidhu ke bang wihi piny kedea upuohnyu Ciig Beer gihn ni yihr nyoge cang. <sup>16</sup>Kwaad ngaa yih luma kedea umuoj wiie ke piih Juog e ngaan nu wahye uboath Juoge. Abea ngaan be yih luma, ngaan nu wahye buu uboath Juoge. <sup>17</sup>Yaa uyiih luma ge umuoj Juoge ke tee me tiihy gene giie me be rom dhaan utaahge ke tiihyo ke teege e keede. Thiow ge umeehge riem atiihb ukeehg oogo rog nyoge kedea ge umeehge rob ke dhog maa anaa akwihy gene. <sup>18</sup>Yaa ayiih luma, nea ge akaj thuohle wale ge adwaahng ke cim e gihn muu yoad gen me nahg gen ngo utooro. Nea ge ukwahyo yihr Juog ke nying ngaa maa atwaany e cing acub wiie e ngaan nu atwaanye uaay.”

<sup>19</sup>Batien kaa arub Jeacuu Ruohdhe keehd gen, e ngo atihng Juoge ke maalo ne ci ne beehdo yi ruohdh Paare kedea upiie wihi koom ruohdh ukwiih Juog. <sup>20</sup>Joe ge athubo ke keedho ke bang wihi piny e ge puohny Ciig Beer yihr nyoge kedea e ge kony teeg Juoge konyo kedea unyoedhe tiihye naa adiehr ke dhe yoohn ameehge gen yug giie me gaahy nyoge.]

<sup>h</sup>16:8 Luub Maarko naa agweed coon yihdh kitaabe me yej be diiw ke gen kedea giie arob nyoge mooge ke nying giie agweed Maarko ge ajoor yi kitaab Maarko 16:1-8

16:6 8:31 16:7 14:28; Luk 24:34 16:15-16 Mat 28:19 16:16 Tihiy 2:38

16:17 Tihiy 8:7; 16:18; Rob ke dhog me kwihj: Tihiy 2:4; 10:46; 19:6; 1Kor 14

16:18 Thuohl: Luk 10:19; Tihiy 28:3-6; Atwaanye uaay: Tihiy 4:30; 5:16; 8:7; Jeam 5:14-15 16:19 Mat 22:44